

隊徵劉孟瞻年譜



劉孟瞻先生年譜卷下



日本上野 小澤文四郎編

十八年戊戌 五十歲

正月刊行春秋左氏傳舊疏攷正八卷

按包慎伯序學詩識小錄藝舟雙楫卷二云孟瞻去毛鄭而治杜氏春

秋成舊疏考證十二卷又楚楨所撰先生墓表云左傳舊疏考正六卷

然此時刊行者八卷而毓崧所撰先考行略通集卷六亦云凡得二百

餘條釐爲八卷故其云十二卷或六卷者俱誤也今歲四月余購得此

書中有汪孟慈喜荀方印或即先生手貽孟慈者果爾亦奇緣矣附識

于此

四月朔揚州水道記後序

丙申之春李蘭卿先生陞任山東都轉留揚候代邀余與吳君熙載至權署纂揚州水道記余與吳君商訂凡例先運河次兩岸工程次兩岸諸湖余分任運河及兩岸工程吳君分任兩岸諸湖都轉盡出藏書及河工官牘有涉于揚州河事者皆筆記之凡三閱月檢書幾及萬卷方事編輯而都轉遽歸道山斯事遂寢去歲閒居多暇乃發篋檢舊稿閱之時吾友劉君楚楨所著寶應圖經久經脫稟其間敘邗溝變遷至爲詳晰因師其意先爲運河考八卷凡八閱月而書始成客詰余曰南北運河緜亘數千里子僅記揚州抑何陋也且欲治揚州運河不當於揚州求之必黃不入運而後揚州之運河可治自明已來河道屢變河患已亟子區區述揚州沿革又何裨乎自吳溝通江淮之後漢晉六朝雖有變更然漕運略不藉此洎唐高宗後漕事歲益增多開元十八年裴耀卿條上便宜謂江南送租庸調物以歲二月上道至揚州入斗門即逢水淺已有阻礙須留一月已

上至四月已後始渡淮入汴多屬汴河乾淺請于河口置倉使江南之舟不入黃河黃河之舟不入洛口代宗廣德二年劉晏領轉運使自揚州遣將部送至河陰江船不入汴汴船不入河河船不入渭江南之運積揚州汴河之運積河陰河船之運積渭口渭船之運入太倉是斐耀卿劉晏已爲轉般之法宋人于真揚楚泗置轉般倉殆卽效法唐人唐李翱來南錄謂二月丙辰次泗州見刺史假舟轉淮上河如揚州庚申下汴渠入淮經盱眙至楚州宋樓鑰北行日錄謂淮陰六十里至洪澤前去歐家渡極淺借潮于瀆頭神欲候酉潮而申初已應開閘張帆三十里過瀆頭又三十里至龜山以風大不可出淮次日出淮三十里至盱眙渡淮至泗州李翱謂由泗州假舟入淮是至泗州換船矣樓鑰謂到洪澤候潮乃開閘是宋人於洪澤鎮置閘矣蓋唐宋之時淮與黃河絕遠故江淮間無河患明永樂間遷都燕京平江伯陳瑄始改運道隄管家湖鑿通清河縣南之淮河

接黃河口爲運道出入然慮黃河入運不免停淤于是做宋洪澤牐制于
河口建新莊閘竝福興清江移風板閘爲五閘互相啟閉運河止許糧船
鮮船應時出口都漕官遣官發籌或三五日一放船過盡口卽築塞五牐
鑰匙掌於都漕口之出入監之工部其大小官民船悉由仁義等五壩車
盤以出外河清江瓜儀口子有敢私擅出入者罪至重夫平江雖爲直達
之法而必嚴其啟閉之制者蓋慮閘制不嚴黃必敗運也其後官民厭車
盤之艱一皆由閘而閘制遂隳黃水日以浸灌此非平江之過也然平江
自爲其巧而欲衆人之安于拙其勢必不可得今淮身淤墊日甚策治河
者能做唐宋轉般之法使黃自黃而淮自淮任拙而不任巧河患庶有瘳
乎余謝之曰余揚人也僅記揚事而已他未遑論也客退余因述作書之
緣起而竝記與客問答之語以爲後序道光戊戌四月朔儀徵劉文淇識

是月淮南同知瑩姚赴臺灣任姚石甫年譜先生與同人賦詩送行

送姚石甫先生 瑩觀察臺灣 青集卷十一

臺澎眞奧區，夔絕重洋隔。民情好闢閱，官務稱繁劇。惟公邀帝簡，超擢逾常格。朝秉通守麾，暮樹外臺戟。亮哉聖人聰，足使遠俗革。舊部聞公來，欣欣手加額。威惠必兼施，次第抒善策。鹽車昔困驥，蕩節今乘驛。鯁生慙濫竽，龍門幸著籍。壯遊不獲從，離緒無由釋。歌謠訪閩疆，書函寄海舶。側耳聆政成，頌聲被金石。

按姚石甫名瑩，石甫其字，一字明叔，姚鼐之從孫，桐城人。嘉慶戊辰進士，官廣西按察使。乾隆五十年十月生，咸豐二年十二月卒，年六十八。著有東槎記略五卷，康輜紀行十六卷，寸陰叢話四卷，識小錄八卷，東溟文集二十六卷，詩集二十卷，名曰中復堂全集。吳嘉賓所撰求自得之室文鈔卷十有傳。

是月李方赤權守揚州 青集卷四送李方赤太守序

按續纂揚州府志 八卷李璋煜字方赤山東諸城人進士官部曹道光

十八年任揚州府慮事精敏明察而不迫慈和而能斷尤以立品立學

爲亟下車觀風試士會府試取前列之有造者教焉常微行求民之疾

苦邵伯埭立恤鰥局董事者立修約以請卒令舉行並釐剔揚州恤鰥

局影射諸弊爲民課農桑以敦儉樸力挽侈靡舊習聞士女有節烈行

亟爲表揚又葺郝忠烈公祠立蕭孝子後訂史忠正公附祀之典增祀

伊太守於桃花庵之載酒堂皆足碩廉儒立興起風俗調江寧知府洊

升布政使丁憂去職

閏四月李方赤聞先生及劉楚楨經明行修與魏靜卿之孝義榜示通衢以

式多士

按念樓公行狀 劉恭冕撰抄本所引云爲崇獎學行以勸多士事照得

守令之官化民成俗是爲專責而化民之術先敷士行勵士之道因亦

多方而於本郡樸學篤行厚爲推崇俾多士知所嚮慕其機尤捷本署
府蒞任之初稔知郡中寶應劉楚楨儀徵劉孟瞻兩君經明行修著書
盈篋昨於郡試之時敦勉多士執經問道實事求是以廣其傳茲又聞
儀徵魏君靜卿前仕嶺表懋箸循聲以母病乞歸不出里閭侍奉維謹
衣不解帶者累年矣夫通儒雅棣循吏孝義天下之所罕見茲乃接踵
於吾郡古之所稱經師兩劉君足以當之古之所稱人師魏君足以當
之本署府皆親式厥廬挹其丰采聆其言論敬禮有加焉昔王文成公
在江西時因贛州致仕縣丞龍韜居官清謹歸休貧乏深嘉廉節表示
通省令官吏歲時存問量資柴米無令用乏特倣其意表式宅里樹之
風聲使爾多士有所矜式亦步亦趨無令三君子專美於前也本署府
暫時權攝所欲爲者多不及爲興利剔弊恐亦託之空言徒煩文告教
化不行咎在太守惟是欲挽民風必以士爲之倡欲敦士行必以師儒

爲之鵠此雖一日之間可與郡人相勉於有成而自幸得人之良多也
苟喻此意漸摩既久將見遠近父老子弟共相做傲是三君子之學與
行足以啟迪生徒激厲末俗非守土者有術以潛移而默化之也吾郡
幸甚斯文幸甚此約道光十八年閏四月二十九日示

魏靜卿行實未詳

夏李方赤示先生以李西林先生知稼堂集及李松谿先生研錄軒詩集先

生撰兩書書後

青集卷七

代李方赤撰更正揚州府學名宦鄉賢祠木主記

青集卷二

記云昔朱邑爲桐鄉令既歿桐鄉人祠之此名宦祠之權輿矣張良食采
于留後人于留城爲子房立廟此鄉賢祠之權輿矣自是以後見于史冊
者甚夥然皆專祠而非總祠也明代始令府州縣學立名宦鄉賢總祠有
司春秋致祭國朝亦因其制豈非欲令諸生觀禮者以古人爲師而有所

取法歟然守土者每視爲具文而儒官亦弗之深考或已列祀典而祠無
其主或祠雖有主而志無其人或名宦誤入鄉賢或鄉賢誤入名宦或名
雖彰著而無關乎本郡或縣已他屬而仍贅列其人其他官爵闕書姓名
誤寫者尤不可殫紀凡此諸失各郡皆所不免而揚郡尤甚前守劉公源
灝督率同僚捐修郡學屬訓導陳君萼寶應舉人劉君寶楠攷定名宦鄉
賢祀典會劉公升任去斯事遂輟今年夏余權守斯郡陳君以前事詳請
立案其應移祀鄉賢者曹憲孫馨張方平桑喬蔣應奎黃瓚王軌凡七人
應移祀名宦者婁師德李德裕韓琦晁補之宋庠陳瑄熊尙文馬從龍馬
文升凡九人應補入名宦者謝安以下凡若干人應補入鄉賢者臧旻以
下凡若干人其官爵姓名訛脫者俱已改正惟有應撤之主或以有舉莫
廢爲疑余案文王世子凡釋奠者必有合也鄭注云國無先聖先師則所
釋奠者當與鄰國合也又云有國故則否鄭注云若唐虞有夔龍伯夷周

有周公魯有孔子則各自奠之不合也疏云此謂諸侯之國釋奠之時若
已國無先聖先師則合祭鄰國先聖先師謂彼此二國共祭此先聖先師
故云合也若已國有先聖先師則不須于鄰國合也當各自祭故云有國
故則否夫先聖先師苟有其人猶不必借資于鄰國况名宦鄉賢尤當各
從其故不必借才于異地也亦明矣名宦中如王安石應移祀通州鄉賢
中如海州之徐璆六合之陳融如臬之胡瑗無錫之杜鎬天長之朱壽昌
通州之錢璞以下十三人應各移祀其鄉何遜海瑞王守仁未官揚州汝
南應曜千乘董永皆非揚人文天祥停留真州三日不得謂流寓均應撤
主余謹據禮正之既飭學別立檔案復作記以諗後之人俾有所考焉

七月朔長孫壽曾

恭甫一
字芝雲

劉容季氏
謄錄

是月李方赤卸事去先生有送李方赤太守序青集卷四方赤權守揚州前

後六月青集卷四桃花庵展上巳會序

序云道光十有八年夏四月辛亥坐補常州府知府諸城李公權守揚州
至秋七月戊申公卸事去莅任才百有二十日而下車之始即值郡試凡
三十日而竣事公乃大署其門曰凡生童來謁者門吏隨時通報毋少稽
留以故懷藝求見者踵相接公優加禮待談藝之餘訪問地方利病有當
興革者立見施行其爲民謀也如謀其家事其誘掖董率也如慈父母嚴
師保之教誨其子弟慈祥而齊邀父老讀公告教之文歎爲數十年所未
見向之市豪爲民害者累足屏息惟恐公之廉知即其甚黠者亦匿迹鄉
曲不敢顯然犯公之禁令甫及一月頌聲四起而公顧歉然不自足曰凡
吾所欲爲而未及爲者甚多即吾所已爲而爲之未慊吾意者亦甚多吾
方自愧不暇而又何頌焉嗚乎古稱循良之吏其所設施者必相其緩急
次第以布之舉凡重農桑興學校懲奢侈禁游惰緝盜賊清獄訟其施之
也有本其爲之也有漸類非旦夕所可奏功以公深於經術達於治體令

得久於其任凡所欲爲而未及爲者皆得有所展布而不難斬至於古之人宜乎公今日歉然有所不自足也然而民已謳思不能忘非公至誠有以感人烏能深入人心而使人戀戀若是先是代者未至民宣言曰公實授揚州矣或曉之以坐補者必俟原缺則又曰新太守至公留揚幫辦矣愚民無知識好爲議論率多可笑然而揚人愛公之意不可謂不厚矣古之郡守有實惠及民民不忍其去於其受代也詣闕乞留或數十人或數百人不憚千里相率而上之人亦每從其所請後世人心不古或有涉於詐僞者茲制遂革今觀揚人愛公之切令古制得行其有不褻裳而思借寇者哉雖然公之所以曉吾民者諄切詳盡民即不能留公果能奉公教令以善其身則無異公之常在揚也文淇辱公之知於公之行也不敢爲華辭謹述揚人戀公之忱與公之嘉惠揚人而歉然不自足者庶幾有當於公意也夫

八月李方赤再權守揚州

按續邗雅八章序念樓外集卷一云太守李公七月受代旋復攝篆庀舊政而加勤

先生與友人重刊郝太僕褒忠錄六卷

按續纂揚州府志卷五祠祀郝忠烈公祠引李方赤記云公諱景春字和滿起家縣教諭歷官至房縣知縣時張獻忠亂於房公守城力盡與一子一僕同被執以不屈死聞遂贈公太僕敕祀於鄉蓋江都有祠之始也又云公之賢後輯公守戰之烈爲褒忠錄六卷其書尙存郡人黃觀察承吉王刺史彥和魏明府廷瑜程指揮光治劉孝廉寶楠劉明經文淇楊上舍亮復釀金刊之以行

先生寄書黃春谷論郝太僕褒忠錄

按先生與春谷書青集不載之春谷與孟瞻書見于夢陔堂文集卷

代李方赤撰重刻郝太僕褒忠錄序 青集卷五

明贈太僕鄉郝公祠在揚郡西郊蓮性寺右其祠舊額曰忠節余考郝公
在明季時未經贈諡其曰忠節者蓋鄉人私諡而舊志以爲贈諡誤矣國
朝乾隆四十年詔舉勝朝殉節之臣核議予諡於是公與鄭公爲虹得諡
忠烈當公之守房縣也外援俱絕力盡而死其孤忠大節媲美睢揚自宜
褒揚節義以風厲天下顧公死之後幾及一載其長子明龍馳驅數千里
倥傯戎馬之中哀求贈卹又有同里張忠節公爲之左右督師揚嗣昌始
爲題請建祠贈蔭而易名之典猶闕如焉然後知我朝旌表明季殉難諸
臣其曠典爲從古所未有也余葺公祠宇因易其舊額而顏之曰郝忠烈
公祠旣已爲之記矣其褒忠錄一書乃公子長君所輯後漸零落乾隆乙
酉如臯姜君忠基重謀剞桂林陳文恭公爲之序而未果竣工至丁未

秋公之六世孫梅謀於其友捐貲付梓始克告成郡人李君斗畫舫錄所記之褒忠錄即此本也其細目詳載畫舫錄中惟袁繼成所作之祭文雷士籲所作之傳畫舫錄皆以爲杜補堂作則李君之疎也今距乾隆丁未五十二年而其板又亡失過半存者亦漸漫漶不可識別郡之紳士醵金重刻余旣於記中詳載諸君姓名刻旣成復爲書其緣起而因以歎世之托文字以傳者猶或有時湮沒惟表揚忠節者其文字必不可得而湮沒也於是錄之刻信之矣

八月中甸劉楚楨爲琢齋撰善士劉君記 念樓集卷六

十月李方赤復受代已大吏命公留後委以他政 念樓外集卷一續邗雅

八章序

先生致書黃春谷論洗冤錄並告以李方赤受代

按先生與春谷書青集不收之夢陔堂文集卷六送太守李公序云道

光戊戌孟冬十日劉明經書來啟視則示以太守李月汀先生所致原
書書首與明經論洗冤錄固刑名家言要惟經生尤得其意吉甫讀斯
語輒益仰先生學識之異政治之茂美也竟讀則見先生將驅五馬麾
白鹿過還省垣眷戀此地士民風乃鄙人芻蕘縞紵之獻夫吉欲申聞
見以志愷澤久矣

是月先生代李方赤撰洗冤錄辨正序

青集卷六

前漢書薛宣傳遇人不以義而見痕者與瘡人之罪鈞惡不直也注應劭
曰以杖手擊人剝其皮膚腫起青黑而無創瘢者律謂痕瘡所謂律者漢
律也意古必有檢驗之法與律例並行顧其書多不傳傳者以洗冤錄爲
最古宋孝宗淳熙元年浙西提點刑獄鄭興裔創爲檢驗格目上之于朝
頒下諸路宋惠父又博采諸書增以己見名曰洗冤集錄後世刑名家奉
以爲金科玉律嘉定錢少詹事養新錄謂輟耕錄記勘釘之法而以爲叟

聞然此錄已先有之又謂此書屢經後人增改失其本來面目唯初刻爲可貴嘉定瞿木夫先生爲詹事之婿宏通博雅得元刻宋淳祐本以校正今本凡若干條名爲洗冤錄辨正余通籍後服官刑部充則例館提調且十年深知此事之難遇有名法家古書善本必多方假抄今得先生是書亟爲刊布以廣其傳嘗讀晉書刑法志謂在昔前漢著律凡六十篇世有增損錯揉無常後人生意各有章句叔孫宣郭令卿馬季長鄭康成諸儒十有餘家魏明帝下詔但得用鄭氏章句不得雜用餘家蓋古大儒精於律令以茲事任大責重故以治經之法治之析其章句正其訛脫如此之詳且盡也况推鞠大辟之法自檢驗始此書所關尤非淺鮮吾願良有司各置一冊于座右焉

此月阮雲臺休致回籍 雷塘庵弟子記卷七

是年撰李西林先生知稼堂集書後 青集卷七

道光戊戌夏諸城李公權守揚州以震澤張君履所撰西林先生家傳見示復以知稼堂集授讀詩凡六卷大都未通籍前及家居需次時所作居多入或以先生宰邑佐郡之所設施未盡見于詩爲憾文淇竊謂即此可以知先生爲政之勤也夫人於少小之時耽于吟詠積數十年之學力其所得於詩者旣深一旦膺民社之寄於布政暇時作爲詩歌以吟詠其情性是豈遽有妨於政然宰劇邑佐大郡案牘之繁日不暇給而搦三寸弱翰號召賓友以風雅自詡吾不知其於仕之道果能自信其優否也先生捷南宮時詩名動公卿間而服官之後捐棄不爲故集中無在河南時詩然而先生之宦績未嘗不可於少作見之自蒲臺至興濟題苦水云涼煥燥濕天宇寬未審何方宰彈丸水土異宜方多端習慣何有行路難則勤恤民隱可知也奉答座主金少伯云捧檄奚妨晚逢年恐未優艱難添閱歷樸訥避呀咻則淡于榮利可知也某令詩競爲市儈作冰山甘與儒冠

爲禍水則傳所謂發奸摘伏激勸諸士者信已看菊云高閒差稱花標格
肯把寒香媚要津則傳所謂以正議屈國泰者信已嗚乎士之有志于古
者當其踈伏時激昂感慨舉生平之抱負寓之于詩及其居官任職得尺
寸之柄可以行其所學而考其所爲顧不能與其言相應甚至決裂破壞
與曩昔所言者適得其反求如先生之政績與詩能一一印證者有幾人
哉然則先生所以能自重其詩者固有在矣爰題末簡以誌仰止之思云

又撰李松谿先生研錄軒詩集書後

青集卷七

太守諸城李公以尊甫松谿先生詩集授讀先生少孤有至性事母湯太
孺人備極色養終身如孺子慕嘗受學于仲兄扶風君仲兄歿哭之遂得
咯血疾年已及艾嘗夢仲兄授讀時景况覺而賦詩今集中所載是也蓋
其孝友之篤出天性而一無所矯強如此官知縣時甚著循聲太孺人卒
于衡水任所喪具幾不給士庶醵金以賻乃得還及罷任羅山後令以倉

穀虧數不肯受代紳士聞之爭先輸納去之日持酒肴相餞者百里不絕
視前史所紀之循吏何多讓焉夫孝友循良之儒其蘊于性情而措諸踐
履者本原深厚由是發爲詩歌即涉學稍淺人猶將重其人而寶其詩矧
以先生之性耆藏書兼好金石其詩於和平冲澹之中尤具典雅新穎之
致則其爲人所寶貴者又當何如耶太守莅揚半載振興文教釐革敝俗
父老歎爲數十政所未有今讀先生是集乃知太守之文章政事所以令
揚民思慕不忘者其來有自云

是年與劉楚楨楊季子重刊說文答問疏證六卷

按李方赤序云說文答問疏證六卷甘泉薛子韻先生所箸陳石士侍
郎亟賞之鈔版閩中而校讎未精審也其友劉君楚楨孝廉劉孟瞻明
經楊季子上舍議重刊之是序是年七月朔作且繫諸此

是年琢齋翁躋九十王句生作序爲壽 舍是集卷七

撰直隸州州判劉君墓表 青集卷九

君姓劉氏諱鞏字又曾原名錫爵字得天先世蘇州人明宣德間遷居寶應八世祖永澄萬曆辛丑進士官兵部主事與顧端文公高忠憲公劉忠端公講學東林世所稱劉職方者也曾祖碩太學生祖斯陶奉祀生父大來揚州府學增生君幼穎悟八歲能屬文稍長益致力于學家極貧叔祖端臨先生官丹徒訓導召至學舍授以經義學益進汪容甫先生每奇君才謂端臨先生曰此君之高第弟子也後將應縣試邑令新安李公與鄉先達語詢邑中年少有才學者先達首舉君名或以語君君慨然曰吾不敢因鄉先達以求進也遂易今名終獲高列洎應院試時方患瘍文成腕痛不可書同試生願以金百鎰售文稿君不與後凡朋試屢有奉金倩代者皆峻卻之曰貪利則喪志逞才則遭忌吾不爲也道光乙酉侍郎辛公從益督學江蘇選君充貢年已四十八矣朝考就職直隸州州判歸里數

歲患鼻淵久不瘥氣血始耗復邁肝疾竟以不起生于乾隆四十三年十月初八日卒于道光十五年五月二十三日即以其年某月日葬於某原配蔡孺人生子三人長棻次芳芳早殤次晉康廩膳生君旣從端臨先生遊學有根柢自少至老手不釋卷丹黃讎校簡畢爛然終不著一書爲文出入韓歐醞釀深厚詩風格雅近中唐偶有作輒棄去晉康輯其詩文稿僅得十之二三凡若干卷藏于家余耳君名久矣每讀君文冲和淵雅之氣洋溢楮墨輒想像其人願內交而不可得歲戊子余與君族叔楚楨同寓金陵君來視楚楨疾乃得相見余謂君雅似喬君循吉君於喬君爲鄉里後進其高才不遇也同而樸雅謙抑之度無一不相似喬君身歿之後子姓氏微而君之季子文采斐然天殆有以昌君之學耶顧余與喬君猶得侍几杖敘殷勤談笑終日以申其繾綣而於君握手數語即別去遂不復相見以余契君至深而會合之難如此殆亦有數存于間而非人所

能主者耶君歿四年君之子以狀介楚楨乞表墓之文余義不獲辭君雖
易今名而知交仍字君曰得天余謂君之故字與行實相應也因系以銘
曰不汨沒其所賦不憂戚於所遇生有錮之者耶死無斃之者耶嗚乎是
爲吾友劉子得天之墓

毓崧以左傳舊疏考正過訪康伯山伯山賦詩贈先生

按伯山詩鈔望雲集卷六云劉孟瞻文洪子毓崧伯山攜其尊人所刻

左傳攷異過訪作此以贈並質孟瞻門庭忽見氣和溫過訪從知世誼
敦如此丰標真玉立慚余兒子誤金根風詩卜氏西河衍文望昌黎北
斗尊謂孟瞻一笑偶然同賤字渾疑安石要爭墩

按續纂揚州府志卷十三康發祥字伯山歲貢生工詩古文詞性耿介
家貧以著述自娛著有三國志補義伯山詩話詩鈔雜文小海山房詠

史詩若干卷卒年七十八

毓崧補廩膳生通集卷六亡妻汪孺人墓志銘

十九年己亥 五十一歲

春前太守李方赤來揚三月四日先生與同人遊桃花庵爲展上巳之會因

撰桃花庵展上巳會序 青集卷四

禊飲之事由來尙矣劉楨魯都賦云素秋二七天漢指隅人胥祓除國子
水嬉此秋禊也而春禊爲盛禮傳云仲春之時於水上釁潔此春禊也而
上巳之禊爲尤盛續齊諧記載晉武帝問三月曲水之義摯虞對以平原
徐肇生女不育固爲不經東皙對以周公飲洛羽觴隨波秦昭置酒金人
捧劍其事於他書未之見恐亦皙之飾說按風俗通義云周禮女巫掌歲
時祓除疾病禊者絜也於水上盥絜也已者祉也邪疾已去祈介祉也韓
詩外傳云三月桃花之時鄭國之俗三月上巳於溱洧兩水之上執蘭招
魂祓除不祥齊書禮儀志云三月三日清明之節將修事於水側禱祀以

祈豐年竊謂韓詩及風俗通所言祓除之義傳之自古而齊志所謂祈年亦有合於古者爲民請命之意周禮太祝掌六祝之辭一曰順祝二曰年祝三曰吉祝四曰化祝五曰瑞祝六曰筴祝鄭司農謂順祝順豐年也瑞祝逆時雨寧風旱也祝有六而爲民祈年者居其二蓋古者劬農重穀如此故於上巳之時除其災惡而迎其嘉祥後人不察以上巳爲遊豫之令節抑亦務末而不尋其本也道光己亥三月四日太守李月汀先生以公事來揚州其弟子趙子新沐王仰賢家模姚惠伯志僑黃靜川瀉錢備卿文份郭星白庚吉李楚珍珩方肖圃鼎銑請公遊桃花庵爲展上巳之會公去歲權守揚州前後僅六月政教肅清民懷其惠公眷念揚人於坐間詢問民生疾苦甚至揚州當鹽筴彫敝之後辛壬之歲繼以水災困苦極矣幸頻年豐稔小民稍得瞻其家室故望歲甚殷與疇昔富贍之時以稼穡爲末務者其情迥異時方一月不雨耳民已竊竊憂之公詢知其情方

愀然不樂是日氣候驟煖岸上行者解衣磐礴至午未之交雷雨大作宣陽導滯二麥昭蘇即謂公之斯遊有以逆時雨順豐年也可同人既作詩以詠歌其事而文淇遂爲之序

春黃春谷示族祖黃生號白山所著之義府字詁屬先生爲校字

按黃白山先生義府字詁序青集卷五云己亥春間觀察黃承吉先生出義府字詁各一帖見示曰此余族祖白山先生所撰新從文宗閣錄出者屬爲校字將以刊行

秋諸生勸先生應試以父琢齋公年踰九旬故不復應因疊前韻戲作別席號舍詩以明心跡青集卷十一

余自辛卯場後作別號舍詩壬辰秋未赴省試復疊前韻甲午乙未爲及門牽率不能堅守舊約丁酉頭場坐席號甚委頓己亥科諸生復有勸行者賦此示之

漫言廣廈萬千間一宿蘧廬鬢更斑似此折磨真不少也應參透利名關
諸生懇欵願依劉勸我重吟白下秋蒲柳自慚衰鈍質銀河那許汎仙舟

附和詩

孟瞻以別號舍詩見示次韻奉答

孫應科

聲名突過杜林間

君著有左傳舊注疏證

鬢已星星戲彩斑

尊公琢齋先生年踰九旬

梅柳紛

紘占春色

謂蘊生寶叔

推君詞賦動江關

從來鼎峙說孫劉改歲聯吟白下秋喬梓同登應不遠

雍正癸卯科先高祖及先曾祖

同捷道光庚子科盛事屬君家矣

莫教散髮掉扁舟

按此和詩非此年所作以云道光庚子科盛事屬君家也庚子毓崧獲

優貢

是年撰銅陵縣典史程先生墓表 青集卷九

表云道光十九年四月八日前銅陵縣典史程先生卒即以其年某月日

葬於泰州南鄉之張家堡與其配兩孺人合兆冢孫祥棟以狀徵銘祥棟
與其叔字光齊名予先後與締交得聞先生行義甚悉宜有銘先生姓程
氏諱應鍾字序東先世休寧人康熙中由江都遷泰州曾祖諱雲鳳誥贈
通奉大夫祖諱盛修雍正庚戌進士由編修改官御史進詠史樂府十二
章得旨褒獎後官至順天府尹考諱選青乾隆癸酉舉人先生幼承家學
熟於史漢工制藝尤精筆札乾隆中遵例以未入流投効分發安徽補銅
陵縣典史自漢世齋夫游徼由三公辟薦至達官者史不絕書沿及唐宋
茲風未沫故其時多魁傑之選後世微員不能有所拔擢居其職者率闕
冗不治事其不肖者至勾通胥吏因緣爲奸而忘其恥先生獨毅然有所
不屑也銅陵故瘠邑又屢被水先生奉檄散賑有蠹役盜用錢二十千立
發其奸其極貧不能待大賑者先捐廉以濟凡辦賑者七前後所捐踰千
金或遇水阻不得前則解鞵以涉巡撫荆公道乾時爲池州守欲拔用之

不果後捐升縣丞在任候銓嘉慶十三年獄有逃犯革任旋緝獲開復遂請告歸士民送江上有泣下者而是時山陽冒賑之案適發郡守縣令皆獲罪大吏亦受嚴譴人乃歎先生之廉能不可及而尤惜其治績無由上聞也後十餘年祥棟至銅陵扶其祖妣張孀人樞邑民環問先生起居爭來襄事其視古循吏得民心者亦豈有歉哉先生歸里後事其伯兄甚謹年踰七十而拜跪應對之節罔或失訓勉子孫各勤所事絕不問家人生產先是京兆公既乞養歸其別子有留京師者因家焉字光幼往依之以年例已符入籍宛平道光丁酉舉順天鄉試第一先生年已八十二矣踰二年卒春秋八十有四先娶延安府知府漢陽張公輔女繼娶澳門同知長洲宋公清源女生男六人紹煥候選從九品早卒次紹安紹裘紹康紹沅次即字光女四人皆適舊族孫四人祥棟廩膳生祥森祥桂祖望曾孫葆慶貽慶銘曰

矯矯先生能守其身祖武是繩不以官卑而怠厥司以禮自持救民之災如己斯飢清白是貽胡此末職不稱厥德下民其惑天聽維聰福祿來崇不於其躬於其孫子報施之理斯銘請視

是年撰娛景堂集序 青集卷六

竇應劉君幼度以嘉慶丁卯舉孝廉屢躋禮闈老始爲五河校官未滿任輒請告歸道光己亥六月以疾卒于家時君弟楚楨館于郡城聞訃奔歸檢其遺稿得娛景堂集三卷皆君所手訂者楚楨旣來郡舉以示余余受而讀之其說經之文不主故常要能實事求是其尤精者如易否卦小人吉大人否亨謂吉當作喜古篆文吉喜二字相似易爲君子謀不爲小人謀故言利貞不言利不貞言貞吉不言不貞吉言利禦寇不言利爲寇上九先否後喜以否喜對言尤其明證洪範九五福五曰考終命謂考讀爲左氏傳下臣獲考之考釋詁考成也赴義捐生以成其志謂之考故解揚

臨刑而曰獲考終命謂終其正命以見考非老壽之謂蓋赴義捐生者雖不壽不得謂之凶短折偷生忘義者雖壽不得謂之考終命禮記中庸禘嘗之義謂專言禘嘗者蓋謂明乎所以重之之義則治國不難非泛言祭祀祭統云古者于禘也發爵賜服順陽義也於嘗也出田邑發秋政順陰義也故曰禘嘗之義大矣治國之本也朱子謂四時皆祭舉其一非是皆有功于經義其他論史諸作具有特識文筆亦廉悍可以傳後矣憶余因楚楨納交于君幾二十年君嘗往來郡城每與談論偶出所作詩示余既爲之序其鶴汀詩鈔矣而絕口不談經史身沒之後余得讀君遺集乃知其于經史之學至爲深邃余前序君詩謂謙雅之量不可及者於茲益信爰促楚楨付諸梓而彙述其大略以告後之讀君書者

按楚楨年譜有云翌年庚子二月楚楨赴京應禮部試則先生撰此序恐在是年故繫之

是年女汝士歸江都國學生田溥光劉容季氏謄錄亡姑國子監生田君
妻劉孺人墓誌銘

按續纂揚州府志卷十一人物志云田溥光字季華江都人欲編廣陵
文徵未果編修汪廷儒輯廣陵思古編溥光舉所搜集者授之蓋田溥
光文淇女夫惜哉早歲而卒再按府志藝文志田溥光著有揚州金石
記金石話目耕齋筆記漢學堂詩文集等生卒未詳

二十年庚子 五十二歲

三月撰黃白山義府字詒序 青集卷五

己亥春間觀察黃春谷先生出義府字詒各一帙見示曰此余族祖白山
先生所撰新從文宗閣錄出者屬爲校字將以刊行文淇受而讀之其有
原書可檢校及灼然知爲筆誤者謹爲改正不知則闕其間有兩書俱見
者如毛詩之信信漢官儀之僕射及考工記兩欒謂之銑國語執而紡於

庭之槐彼此俱見當是編纂時偶未及檢又如義府逋峻條引三國志趙
達傳注而無所申釋亦是寫者脫誤既無別本可校謹仍其舊不敢妄有
改易是書博大精深所解釋者皆實事求是不爲鑿空之談夫聲音訓詁
之學於今日稱極盛而先生實先發之義府僂僂條下云僂僂上力主切
下於主切俯身向前也此背曲之病莊子作疢僂字書僂佻當即一義又
左傳臧會竊其寶龜僂句此亦以其形名之史記甌窶滿篝甌窶高地亦
以其形名之據莊子疢僂則僂僂佻僂句甌窶皆當作此音以語有倒
易字有通借諸書昧其義遂異其音此與王懷祖先生廣雅疏證枸篔條
下說同女陽物而晦時條下云左傳是謂近女室疾如蠱非鬼非食惑以
喪志此本四字成句二句成韻隸釋孟郁修堯廟碑乾川見徵條下云漢
碑多以川爲乾坤字無作坤者易坤者順也順諧川聲而川又諧紉馴諸
字疑古坤字作川者假借用之此與王伯申先生經義述聞同字詁吹字

條下云許慎注詮詞也引詩吹求厥寧愚按詮詞謂自解說其上文語意之詞詩適駿有聲以下四句皆發明文王有聲之義注但以適爲發語詞是不知說文詮詞之訓此與戴東原先生毛鄭詩考正說同又如以與而通用引樂記治世之音安以樂也字一作兮引淮南子其儀一也心如結也有讀爲又孟子聖人有憂之與上堯獨憂之句相血脉均與伯申先生經傳釋詞同是書別無刻本諸公固所未見然如以上所舉數端皆經生家奉爲圭臬者而具見于先生書中亦足見先生小學之精矣他如魏其武安列傳程李俱東西宮衛尉今衆辱程將軍仲孺獨不爲李將軍地乎謂此語隱隱帶刺時李廣爲未央衛尉程不識爲長樂衛尉未央宮乃衛天子長樂宮乃衛太后意言投鼠忌器以挑在坐諸人之怒隸釋都鄉正衛彈碑據漢官儀民年二十三爲正一歲爲衛士正謂正卒衛謂衛士駁方桐山引周禮注街彈室之誤均足信今而傳後其餘有關於經史者不

可枚舉讀者當自得之觀察嘗謂古人文字重聲而不重形故得其聲凡與聲相近之字皆可通假近爲文說發明以聲爲綱之義文淇摳衣之際幸得飶聞其說觀察初亦未見先生之書而先生書中論字有初義之音有次義之音或字本無義以聲取之或借音專而本音遂廢幼眇之論已見萌芽將待觀察而昌明之矣按刻本義府字詁以此序爲跋

春應郡守汪于泗請與郡中紳士商榷恤鰥局事通集卷五揚州恤鰥局新

建總坊記

按毓崧代郡守汪于泗所撰之揚府恤鰥局新建總坊記通集卷五云

余以庚子春來守此郡甫下車即延董局紳士魏太令廷瑜程指揮光治吳孝廉文鑄劉明經文淇等在局公同商榷建一總坊

是春毓崧舉優貢生通集卷六亡妻汪孺人墓誌銘

八月八日父琢齋公卒年九十有二先生撰先府君行略青集卷十

行略云府君姓劉氏諱錫瑜字懷瑾一字琢齋先世居溧水曾祖國學生諱春和始由溧水遷揚州以長子守備君起寅貴贈明威將軍祖諱起泰國學生考諱嚳與其從兄儒林君曠占籍儀徵補博士弟子府君昆弟六人伯仲早卒三伯父諱錫章僑居鹽城四伯父諱錫璜補郡文學出嗣儒林君後六叔父諱令聞府君年九歲即失怙恃家室蕩然遂至鹽城值三伯父爲事牽累窮于生計不能撫育府君賣豆于鹽城市上日得二十錢僅供饘鬻四伯父廉知之乃往携府君歸親爲教讀是時府君年十二歲始入家塾讀四子書詩書易三經至十四歲四伯父又卒遂廢讀在族兄肆習賈未及三載有同業張翁者習知府君年雖童幼而老成幹練遂以肆事託焉府君顧念每歲所得不過二十金無以立家業遂有志學醫購四大家書讀至夜半晝則執業默誦所讀書聞人有奇方多方購覓躬自修合求治者其效如神日不暇給如是者幾十載張翁乃另延一人治肆

事仍請府君總理其綱府君乃賃宅別居自是病家有餽遺者始收受之前此不受一錢也年三十五娶吾母淩孺人時六叔父已成立舉室來依家累日重府君素性恬淡不與人爭利每揭債以供朝夕遇貧苦者悉心診治或不能具藥餌則出資助之嘗有役夫某住河東患背疽府君每日徒步渡河其家赤貧無甘旨調理府君袖錢往遺之又有患危證者衆醫莫能治其家已無生望最後延府君往時值炎夏斗室中狹隘殊甚患者臥牀不言語者已三日瘡口潰裂蠅蚋叢集家人莫敢嚮邇立戶外以長竹繫塵尾爲之驅蠅府君一視輒謂可治其家猶未敢信府君曰汝家貧若此吾豈望報哉然其證實可生遂朝夕往視未匝月全愈若富貴之家隨其酬謝從不之較亦未嘗以他事干謁自六十後家計稍裕始免揭債有餘即以周窮乏先是有祖遺香肆一區長房次房輪年直業其不直業之歲直者貼銀三十金次房以府君幼弱遂獨據其業起家至數萬金時

府君困甚親族勸以約劑往通計三十年應得之數不下千金否則令其還肆府君曰吾兄若慷慨者不待吾告告則爭爭而得利吾弗爲也及其家中落子孫幾無以自存府君極力拯助之無小吝凡族中無主後者每歲必省視其墓歷數日乃罷弟子貧不能具修脯者盡心教誨之年至八十有延請診視者始謝絕之然遇有危險之證踵門來告者猶爲之處治方藥鄉之人言及府君者無不稱其厚德焉性好讀書資質最敏壯年所讀者至老猶能背誦暇即瀏覽載籍以自娛樂後因目力昏耗乃已府君自悔幼時失學不能承先人儒業僅以贊補國子學生乃令不孝文淇讀書每自塾歸必督課盡一燭率以爲常時值屢空親串有勸令廢讀者府君堅執不肯及文淇應布政司試凡十四次無所遇而府君初無幾微不豫之色蓋冲和澹定不以人事得失介懷類如此以故年登九十矍鑠強固去歲精神稍覺衰弱今歲夏秋間漸形頹憊然飲食猶能如常詎意寢

疾二日遂至不起嗚乎痛哉伏念府君少時流離顛沛中年勞苦拮据可謂備生人之極艱竭力經營家獲再造而力行善事至老不衰生平隱德爲文淇所不及知者甚多積善之躬當食厚報顧文淇學業譎陋不能有所顯揚蚤夜常用自疚然以府君精力強固人僉謂期頤可卜卽文淇之心示私冀優游頤養可稱百歲之觴乃侍奉無狀竟隕天年此皆不孝罪孽所鍾天降之罰夫復何尤嗚乎痛哉府君生于乾隆十四年六月十四日丑時卒於道光二十年八月初八日戌時享年九十有二歲恭遇覃恩三膺粟帛配淩孺人先府君十八年卒生子一卽不孝文淇嘉慶己卯科優貢生候選訓導女一適同縣府學生員陳傳洛孫一毓崧道光庚子科優貢生孫女一適國學生田溥光曾孫壽曾幼文淇將以明年二月某日奉府君柩與吾母淩孺人合葬于城西郝家寶塔之原文淇苦塊餘生昏迷瞽亂於府君懿行罍漏實多然不敢以無實之辭誣我先人伏惟當代

立言君子賜之傳銘以光窀穸則世世子孫感且不朽謹狀

十一月三日友人方申卒病革時屬毓崧為所著易學五書撰序通集卷

二方氏易學五書序

是年撰項羽都江都考青集卷四

前漢書地理志廣陵國高帝六年屬荆毛本荆下衍州字非也十一年更荆謂劉賈國非州名

屬吳景帝四年更名江都武帝元狩三年更名廣陵領縣四廣陵江都高

郵平安據志則江都郡乃景帝所立其以江都名郡者以郡有江都縣也

顧廣陵之名已見于史記六國表楚懷王十年城廣陵此人所共知而江

都之名景帝以前未之前聞今按史記秦楚之際月表知江都之名項羽

時已有此縣太平寰宇記謂漢景帝立江月表分二十一格第一格載義

帝事第二第三格皆言項羽事第二格言諸侯尊懷王為義帝西楚伯項

王籍始為天下主命立十八王都彭城第三格言項籍自立為西楚霸王

都江都以下十八格分言十八王所都之地史記高祖本紀義帝元年正月項羽自立爲西楚霸王王梁楚地九郡都彭城以下紀十八王所分之地四月兵罷戲下諸侯各就國項羽亦是月出關使人徙義帝于長沙郴縣是義帝之徙郴縣亦在四月也項羽本紀亦言項王自立爲西楚霸王王九郡都彭城而月表第二格言項羽都彭城第三格言都江都者江都乃項羽初都之地也懷王初都盱台後徙盱台之彭城項羽于義帝元年正月猶在關中分天下立諸將爲侯王是時雖有都彭城之意而懷王尙在彭城故先以江都爲都羽本紀云漢之元年四月諸侯罷戲下各就國項王出之國使人徙義帝長沙郴縣是羽于四月始都彭城且懷王未徙郴縣之先彭城方爲懷王所都羽豈能與懷王共都一地此亦事理之顯然可見者故知江都爲項羽初都之地也羽雖未至江都然先議所都之地實在江都太史公于羽本紀直言都彭城不言都江都所以紀其實

月表兼載都江都所以存其名此月表紀項羽事所以獨立二格一載都
彭城一載都江都也此正史公體例之精若所都之地無先後之分則月
表不必立二格矣漢書異姓諸侯王表紀項羽事第立一格言都彭城從
其略也必知廣陵江都爲項王所分之地者史記羽本紀謂羽王梁楚地
漢書高祖本紀五年漢王與齊王信魏相國越期會擊楚至固陵不會漢
王謂張良曰諸侯不從奈何張良曰楚兵且破未有分地其不至固宜今
能取睢陽以北至穀城皆以王彭越從陳以東傅海與齊王信則楚易破
也從之羽死漢王下令曰楚地已定義帝無後欲存恤楚衆以定其主齊
王信習楚風俗更立爲楚王王淮北都下邳魏相國建成侯彭越勤勞魏
民卑下士卒常以少擊衆數破楚軍其以魏故地王之號曰梁王都定陶
是以羽之楚地分信羽之梁地分越也高祖本紀六年冬十月人告楚王
信謀反執之上還至洛陽赦韓信春正月韓王信等奏請以故東陽郡

陵說見後鄣郡吳郡五十三縣立劉賈爲荆王以碭郡薛郡鄴郡三十六縣立

弟文信君交爲楚王楚王交傳高祖六年旣廢楚王信分其地爲二國立

賈爲荆王交爲楚王是又分韓信所封之楚爲二國而以故東陽郡鄣郡

吳郡即會稽郡爲荆國也黥布傳布發兵反東擊荆荆王劉賈走死富陵高祖

本紀十二年詔曰吳古之建國也日者荆王兼有其地今死亡後朕欲復

立吳王乃立沛侯濞爲吳王吳王濞傳立濞爲吳王王三郡五十三城所

謂三郡五十三城者即賈所封故東陽郡鄣郡吳郡五十三縣也江都易

王非傳初立爲汝南王吳楚反時非自請擊吳吳已破徙王江都治吳故

國子建有罪自殺地入于漢爲廣陵郡廣陵厲王胥傳武帝元狩六年立

爲廣陵王前漢地理志廣陵下云江都易王非廣陵厲王胥皆都此由易

王厲王而上遡之吳王濞所封之地因荆王賈賈因楚王信信因項羽有

明徵矣灌嬰傳齊地已定使嬰別將擊楚將公杲于魯北破之前至下相

以東南僮取慮徐度淮盡降其城邑至廣陵蘇林曰別將兵屯廣陵也師古曰此說非也謂從下相以

東南盡降城邑乃則廣陵為項羽地尤為確證或問曰廣陵為項羽地信至廣陵皆平之

已第前志云高帝六年屬荆不知未屬荆之前廣陵江都二縣究屬何郡

曰是則水經注言之矣水經注淮水篇云淮陰縣有中瀆水首受江於廣

陵郡之江都縣縣城臨江下云楚漢之間為東陽郡高祖六年為荆國十

一年為吳然則廣陵江都二縣楚漢之間屬東陽郡太平寰宇記謂揚州在楚為九江郡地項

羽以封英布者非也漢書地理志雖無東陽郡而高祖紀云以故東陽郡鄣郡吳郡

立劉賈為荆王是楚漢之間有東陽郡矣文穎注東陽今下邳文穎後漢

時人按後漢書郡國志下邳國武帝置為臨淮郡是後漢之下邳郡即前

漢之臨淮郡亦即楚漢之間東陽郡也前志臨淮郡有東陽縣焦氏里堂

謂東陽郡自治廣陵廣陵為附郡之縣東陽郡自在廣陵之東東陽郡不

治東陽其論甚竅而項羽之都江都自來方志諸書皆未之及幸賴月表

有此一語余故廣引史漢諸書證成其說似足以爲江都最先之故實矣
又按史記貨殖列傳云夫自淮北沛陳汝南南郡此西楚也彭城以東東
海吳廣陵此東楚也衡山九江江南豫章長沙此南楚也項羽本紀云項
王自立爲西楚霸王王九郡都彭城孟康注云舊名江陵爲南楚吳爲東
楚彭城爲西楚即據貨殖傳而言羽立自立爲西楚霸王都彭城而東海
吳廣陵諸郡亦羽所分之地唐人之詠廣陵者每以西楚稱之司空曙送
鄭況往淮南詩云西楚見南關韓翃送友之揚州詩云綠樹叢垓下青蕪
闊楚西詠揚州而專及羽事又嘉靖志載隋彭城閣引大業雜記注云舊
爲彭城鄉煬帝因地以名閣揚州而有彭城鄉是皆因江都爲項羽地故
有西楚彭城之稱也

按青集此後收載阮元附跋然視揚州叢刻所載附跋少其前半

又按揚州叢刻所載項羽都江都考跋云江都縣衙前榜二其一曰邑

肇荆王汪容甫先生據史駁之謂孝景前四年始徙汝南王江都荆王
劉賈以高帝六年封至十一年爲英布所殺無後其立國至淺賈都於
吳此地爲其支邑自名廣陵至孝景置江都國賈死已四十二年江都
縣之名前此絕無所見疑即託始於此按樂史太平寰宇記謂漢景帝

立江都遂因國以立縣汪氏之說蓋與之同近

按以下文青
集收載之

劉孟瞻明

經文淇作項羽都江都考據史記秦楚之際月表第三格知項羽自立
爲西楚霸王都江都然則項羽曾以江都爲都是秦楚之間早有江都
之名非始於景帝矣此說甚爲新異可喜及檢新揚州府志沿革建置
門有雙注云史記秦楚之際月表有項羽都彭城一本又云都江都考
諸書無羽都江都之事殆傳刻誤此蓋嘉慶年間修志者見有無江都
之本而致疑也明人程正揆所刻張守節正義本月表脫去都江都三字余檢至此亦爲之疑因思
余家文選樓有舊本史記檢之則是元中統二年連索隱之板明明有

都江都一事爲之大快然則府志所云有江都者古人之遺無者爲妄人削去也元中統與宋理宗時相值則與宋板無異桓字缺筆世所習也此書古色古香恐勝於今單行索隱之處尙多俟再校之因復思古人如項羽者滅秦封漢氣蓋一世快意之事正在爲霸王都江都之時而江都王者以項氏爲最先乃此事黯然不彰緜緜欲絕幸賴明眼人於旁行斜上蠅頭細書之月表識別而出而又得此霉爛蠹蝕五百餘年之故紙爲之確證所以古本之可貴如此道光二十年儀徵阮元跋

是年與楊季子等刻薛子韻所著文選古字通疏證六卷

按通集

卷十三文選古字通疏證序代涇縣翟君惟善作云某以嘉慶

中遊揚州與甘泉薛君子韻同肄業於梅花書院以文行相砥礪者且二十年子韻博極群書詞藻鴻茂尤精於小學著說文答問疏證六卷

又以文選多古字思爲文選古字通疏證一書草創有年尙未卒業道

光戊子冬新城陳碩士師督學福建延子韻往裏校己丑秋按臨汀州
子韻猝得疾卒於行館碩士師遣使護其喪歸而出貲屬閩士爲刻說
文答問疏證校讐者未能精密往往參以臆見碩士師深以爲憾某時
官江西寄金至揚州屬友人寶應劉君楚楨甘泉楊君季子儀徵劉君
孟瞻詳加審定重梓行之而諸君已先期約同人釀金另爲刊板因
就文選古字通疏證內擇其首尾完具者錄出六卷即以某所寄金
付諸梓人而問序於某此序作于辛丑季春然其開雕在于此年孟
冬

二十一年辛丑 五十三歲

二月奉父琢齋公柩與凌孺人合葬于城西郝家寶塔之原

青集卷十先府

君行略

四月撰夢陔堂文說序

青集卷六

夢陔堂文說者觀察黃春谷先生之所作也先生以揚雄有童子雕蟲篆刻壯夫不爲之語而後世之輕視文辭者輒祖述雄語以爲口實雄又以史遷行不副文是非謬於聖人而班固亦即以其語爲傳贊又申之以先黃老後六經等說儼然與雄爲一唱一和因作文說正之凡若于篇其中論雄者至多而論固者僅一篇以是書專爲辨雄而作也書作於癸巳成於庚子先梓其十一篇而命文淇序其緣起夫雄固之失先儒亦嘗言之而雄之作奸於前固之效尤於後則前人從無論及之者先生慨然發憤條舉二家之失皆根據史傳不爲鑿空之談雄謂辭賦壯夫不爲而雄所作諸賦正在壯年雄自序其賦謂多諷諫之辭人皆信以爲實而不知賦作在先序作在後賦作於成帝之時比昭儀於西王母又以崑崙爲西王母所居賦中所用故實皆係崑崙其所以獻媚於昭儀者至矣晚年作序乃自託於諷諫是其巧於作僞也其他雜文及法言太玄諸篇皆一一條

其謬妄而司馬相如東方朔之爲雄所排詆者亦皆辨明其冤廓清之功
比於武事矣至於班固誣遷之罪較甚於雄漢書不應爲雄立傳其所以
立雄傳者固恃雄爲奧援以爲誣遷之地他傳皆作史者撰述之辭獨於
司馬遷揚雄二傳則全錄二人自序之辭蓋固若實敘二人之事則遷所
以任中書令之故與雄仕莽之事皆不得言故創爲此體且史公報任
安書先言陵敗書聞即叙召問之辭後乃言李陵旣生降是聞敗在前聞
降在後班固於李陵傳顛倒其書中之事以爲陵降之後遷猶推言陵功
遷作中書令在武帝旣悔之後固沒而不叙但言尊寵任職夫中書令即
尚書令也爲權要之職固於百官公卿表不獨不著其中書令之官並尚
書令之職而亦減滅之又於成帝紀及張安世京房賈捐之劉向等傳任
意增添以成其含混之計先生披卻導窾迎刃而解可謂洞悉其情狀矣
至其所以表章太史公者尤不遺餘力謂史公自序中兩太史公曰前稱

其父談後乃自稱故別行另起徧舉孔子世家及老莊申韓仲尼弟子孟子荀卿諸列傳之辭及五帝本紀贊以明其所以尊聖表經而黜黃老者甚至外戚世家危言讜論委曲申明莫非原本聖經以爲垂戒章比句櫛洞豁昭晰洵讀史者之一大快事也雄又謂靡麗之賦勸百而風一特設風勸二字以陷司馬相如乃先誤解詩序序謂上以風化下下以風刺上主文而譎諫言之者無罪聞之者足以戒故曰風乃所以明正風而非變風自雄以風爲刺惡而後人之讀詩序者不明風刺諫戒等本然之字義以爲屬於衰世闇主之規譏而詩人溫柔敦厚之旨以失先生謂六經莫外於小學小學者即載道之文字而文字之訓詁莫非本於聲音故凡字義以所從之聲綱爲主而偏旁乃逐物形迹之目又謂字義必視乎隨文所用而字之本義則一核其本字之聲斯義無不明而其字義遷流之故亦即於字中可見明乎此則知風刺諫戒等字初不主于刺惡而詩序上

以風化下數句益確然知爲正風而非變風此皆發前人所未發者尤治經者之一大快事也先生嘗謂著書立說原不必好議前人然學術之是非關乎人心之邪正迹雄之所以毀遷者乃惡遷之尊孔孟闡六經於前無以爲己之地故謂子長云五經不如老子之約以見遷之不能闡明聖道其實遷無此語即遷父談亦無此語雄組織談之語意以成此辭固之所以毀遷者周效遷之體例以爲漢書攘竊其辭又欲沒遷之善以揚己名乃多爲誣陷之語使徒震乎揚班之名而一任其是非混淆邪正倒置亦學術人心之患也世之讀是書者苟能細爲尋繹則先生嘉惠來學之意與其不得已之苦心其亦可以共見也已因撮舉是書之崖略以諗世之實事求是者

冬撰舍是集序

青集卷六

昔劉知幾謂作史有三長曰才曰學曰識後人取以論詩謂作詩者亦必

具三長而後其詩乃工錢辛楣先生申其說云放筆千言揮灑自如詩之才也含經咀史無一字無來歷詩之學也轉益多師滌淫哇而遠鄙俗詩之識也是固然已竊謂三者之中尤必以學爲本才非學則不展識非學則不卓吾友王君句生性情肫篤淵源庭誥工爲古文詞尤好爲詩自漢魏以及三唐剖析原委考究得失其於諸家體製聲調神韻體會至微而抉擇至當故其爲詩也典雅和平舉世俗疎淺浮薄之習一洗而空吾於是歎句生才之博識之高而尤服其學之邃也句生旣長於詩顧不欲以詩自見而名其集曰舍是蓋深知學詩之難而又以士人所當學者非詩之所得盡故前此數十年專用力於詩亦旣卓然有以自見而猶歉然若不自足謂不能逮古之作者後此則屏棄一切務爲有用之學深以從前之作輟爲恨謂爾後詠歌之事不擬更作而欲專力治經以續成舊學其意謙而志銳爲如何邪昔洪稚存孫淵如兩先生皆先爲詞章之學而後

從事於經卒之經術文章兼擅其美以句生之勤學若是其於詩也旣奄有衆長則其治經也必能發揮前賢之微言奧義矣余才識謏陋所學又不能專遜於句生遠甚頃以梓詩屬序固辭不得因念句生好左氏學左氏史家之祖遂舉三長之說以復焉未知有當於句生之意否也

冬與毓崧校勘宋元鎮江府志

青集卷五校刻宋元鎮江府志序

是年友人汪孟慈督餉兩淮因與先生及汪廷儒首唱請旌明末揚州殉難

貞烈婦女千餘人建坊入祠歲時奉祀

汪孟慈先生行述

按續纂揚州府志

卷九云汪廷儒字醇卿儀徵人道光二十年舉人二

十四年進士改庶吉士授編修二十六年典試江西咸豐元年分校鄉

闈胥以得士稱生平友愛篤行有族弟廷儀少失怙恃依廷儒爲生侍

之如己弟居鄉以郡中節孝年久湮沒請建祠坊又爲合郡亡友刊古

今文傳世名廣陵思古內外篇自著有延月軒古文鈔知榮根味軒詩

集年四十九卒於京邸子有泰庠生

是年撰經遺堂集序

江都韋酉山先生博學通才所著詩文詞集二十六卷蔚然鉅觀丁小研比部序中言之詳矣文淇與校字之役獲觀全集竊歎先生之政事卓絕迥非尋常俗吏之所可及也先生以名進士出宰廣西歷蒼梧懷集馬平凌雲四縣以彊直爲同僚所忌讒諸上官卒以軍需案罷官謫戍士論惜之其在馬平也江上有搶奪案先生聞報即馳騎往捕賊方入鄰村分贓未散全數弋獲一訊服罪即日具讞詞以上每冬初粵東將軍委弁赴滇買馬至柳江移縣代雇民船先生以非民情所欲爲免其役湖南崗苗之叛督撫赴柳江防堵懷遠令某捕得難民七十餘名誣服從賊招解到郡檄先生覆訊平反其獄難民得釋縣捕役名曰鷹捕有蔣標者索事主賄先生立斃之杖下一縣肅然提標兵七千名在城歲終例借縣倉米千石

歷年多不能給先生力爲預籌如數支借六營歡感此皆見于題馬平衙齋詩注中者在蒼梧懷集凌雲也地尤繁劇凡有來訟者先生據几手自立讞凡二千宗皆剖斷明允其見於詠歌者則如集中箬葉刀青竹竿一片碣山有木諸樂府是已而先生顧歎然不敢自矜也其蒼梧行部詩云兀然據牘背涕淚下被筆才拙勉清靜此外又無術懷集縣憫農行云我來因陋無良籌民訟水利爭呶囁眼前勘斷非遠謀勸分行部心懷羞則其勤求民瘼不自滿假可知又如泗城府復南北關左江江心巖暨猺人獻歲岑將軍廟諸碑文具見先生不鄙夷其民無事不與民休養而其正祀典釐民俗之意反覆詳盡其治視古人亦何多讓後之人欲考先生政事者胥可於詩文中求之則是編固不可不亟刻也先是甲午乙未間余與小研比部嘗同文酒之會每言先生全集副本久藏笥中行將付梓未幾而比部遽歸道山茲事遂輟今年春先生高弟江君鳴玉文君汝梅

范君凌靈楊君亮暨同志友夏君慶保汪君廷儒搜求先生遺書力謀剞
劂適程君焜得一寫本於其族子雅扶處自歛郵寄較比部所藏尤爲完
善比部喆嗣光煦篤念師門追承先志遂以百金付余俾鈔諸木同里岑
君建功黃君爽蔣君照陳君輅復出貲刷印百部令讀者觀爲快而先生
之孫光祖亦於是秋補博士弟子余故備述先生政事之美見循吏之必
當有後並是集刊布之難如此光祖其克守遺經繼先生未竟之緒也

按此序云先生之孫光祖亦於是秋補博士弟子而檢光緒江都縣續
志卷十六章光祖補博士弟子亦在道光二十一年且是書既是年孟
冬所刻則此序作于是年也明矣

二十二年壬寅 五十四歲

二月二十二日孫女順曾生 劉容季氏 贈錄

四月代阮伯元撰校刻宋元鎮江府志序 青集卷五

余家久藏宋嘉定元至順寫本鎮江志二部乃乾隆六十年宣城張木青
學士燾所贈之書嘉慶間曾經進呈內府又錄兩副本一藏家中文選樓
一藏焦山書藏以待有志者刊之良以二書有關於京口之掌故甚鉅也
京口自東晉以來屹爲重鎮流民僑郡分併改隸都督開府參佐從事寄
治版授建置紛煩以及宋之差遣元之椽屬讀史者憚於鉤稽往往沿訛
襲謬今詳觀宋志於六朝僑寄郡縣縷析條分於節度觀察稱官罷復紀
之甚詳其刺守歷任年月於紀傳所不載者皆稽考得其次序是故一人
之傳必參酌群書而後定如刺史韋損傳以唐地理志練塘碑及李華復
練塘頌序招隱大律師碑參定都知兵馬使張子良等傳以新舊唐書李
錡傳舊唐書憲宗紀通鑑太平廣記參定此例爲前此作郡志者所未有
至於元至順志本承宋志而作然絕不勦襲其書宋志於刺守宰貳等官
載至嘉定九年止而元志即從嘉定十年起其例尤爲可法土產門引說

文廣雅字林方言等書亦地志中所僅見又二書於晉宋以來士大夫居宅墳墓皆詳其坊巷鄉都所在其作銘作記之人亦莫不羅列雖遺跡久湮而按籍考之猶可得其彷彿後人性好簡略鮮有及此之詳明者其餘精當處亦不勝僂指二書洵海內之秘笈也乃問之鎮江人無肯彙之者

余於送楊忠愍公墨蹟歸焦山記中已慨乎言之去冬丹徒包景維良丞

介吳陶伯孝廉文鑄來謁余談次及之景維因言及其考中憲知有是書

欲刻未果今願刊布以成先志余因出家中選樓本並發焦山書藏本竣校

仍還焦山再加繙閱選樓本爲歸安嚴久能元照所校焦山本爲烏程張秋水

鑑所校又丹徒戴桐孫守梧亦有籤記其中精確者致多然猶引其端未

竟其緒復屬門下士劉孟瞻文洪暨其子伯山毓詳考全書體例及所

徵引各書正其譌誤作爲校勘記四卷附刻於後二書俱不箸撰人姓名

書錄解題有盧憲鎮江志宋志中稱憲者四條因共定嘉定志爲盧憲所

作而至順志則不知出於誰手適丹徒柳賓叔孝廉與恩以書來告謂檢
鎮江府志成化舊序知至順志爲俞希魯所作余按俞氏乃元末遺老爲
金華宋濂所推若非詳撰此志烏知俞氏之學精密若是則刻書洵有功
於古人也是書初刻時不知書中載包氏名人甚多乃校勘後知包氏爲
丹徒舊族宋元二志人物門俱以漢大鴻臚包咸爲首厥後包融包何包
信俱有名於唐代而元志俞庸修高資橋記亦言丹徒包氏不墜先業中
憲名祥麟字厚村捐賑施藥頗多善舉實爲鴻臚之後雖此書朽蠹而班
班可考然則是書之刻於包氏固天理當而人心安也刻旣成余故樂爲
序之以爲刻古書者勸大清道光二十二年夏至日揚州予告太子太保
體仁閣大學士七十九叟阮元序

是月宋元鎮江府志校勘竣事因成宋元鎮江府志校勘記四卷並自撰其

校刻古書難矣而展轉傳抄之書則校刻尤難是故宋元槧本及影宋抄本皆可據原書付梓間有訛誤著于別錄而不必改易舊文至於傳抄之書脫文錯簡往往而是若不刊謬正訛則其書幾不可讀亦憾事也伏讀欽定四庫全書凡從永樂大典錄出者悉經刪衍補脫京口耆舊傳陳升之許暘米友仁邵節譚知柔李琪等傳案語或引嘉定鎮江志或引至順鎮江志疑二書亦從大典中錄出館臣曾見是書而未經編定故有宋志斷爛而以元志補之者有元志淆譌而以宋志屬入者有子注而誤爲正文者有子目而混爲總類者選樓校本及焦山校本已詳言其誤今因包君景維刊刻是書相國阮公命文淇及子毓崧重加校正並諭以不必以摯經室提要在前有所牽就總期實事求是不爲鑿空之談爰取二書反覆詳校其有彼此互淆前後倒置者悉加釐正而仍載原文於校勘記並述其所以改易之故至嘉定續志咸淳志永樂志之屬入二書者則另入

附錄之中而不加刪削俾後人得以考見昔宋彭叔夏作文苑英華辨證其體例大約有三實屬承訛在所當改別有依據不可妄改義可兩存不必遽改茲編所校略仿其例其有以一條而彙舉各條者亦彭氏之例也惟是學識譎陋疎謬猶多尙望博雅君子匡其不逮焉道光壬寅孟夏儀

徵劉文淇識

四月三十日王西御句生之父家幹時亭卒年七十八先生爲撰王時亭

先生家傳

青集卷八

七月三日黃春谷卒年七十二研經室再續二集卷二

是年甘泉岑建功欲刻舊唐書延先生父子及羅茗香陳卓人校勘先生與茗香商訂凡例四條

按校刻漢書凡例通集卷五云道光壬寅癸卯揚州刻舊唐書除分校

寫樣刻樣延請四人外另延四人分纂校勘記每人分任數十卷目錄

內臚列姓名又輿地紀勝序通集卷七云道光壬寅丹徒包氏欲刻嘉定至順鎮江志借錄選樓抄本余遂檢紀勝中鎮江府一卷俾其附刻於後而全書仍未能刻也是歲甘泉岑紹周提舉建功方重刻舊唐書延其友分纂校勘記而自輯逸文

按續纂揚州府志卷十四云岑建功字紹周監生性勤謹好儒雅頗善居積每謂天之所厚不敢自私凡死喪孤寡無告者咸周洽之每得異書必鳩工重刊如舊唐書輿地紀勝皆見珍於世

羅茗香傳詳咸豐三年

二十三年癸卯 五十五歲

三月三日阮伯元福壽第燬於火文選樓所藏之書歸灰燼雷塘庵弟子記
卷八時先生館于第校勘舊唐書

按嵇庵文集卷二重刻舊唐書後敘云今紹周獨任其事延余友羅君

茗香士琳劉君孟瞻

文洪

總校即以余所藏聞本並殿本互勘時孟瞻

館於儀徵相國府第府燼於火而余書因是又失去十五本

七月爲門人陳卓人撰句溪雜箸序 青集卷六

嘉慶庚辰冬先舅氏凌曉樓先生自粵中返里家居授徒卓人年甫舞勺受業於門天資穎悟已具成人之概道光甲申先舅氏客授他氏卓人遂學於梅君蘊生受詩文之法學日進乙酉春先舅氏復家居閉戶箸述精公羊春秋兼通鄭氏禮卓人復從受經飲聞緒論斐然有箸述之志洎先舅氏臥病董子祠中令卓人問字於余余學殖荒落於余舅氏無所肖似而公羊禮服之學卓人蚤得其傳遂乃博稽載藉凡有關於何鄭之學者手自抄錄推闡其義所著白虎通疏證十二卷實能條舉舊聞絕無嚮壁虛造之說今歲季夏發行篋中說經之文若干篇先付諸梓而乞序於余余維漢儒之學經唐人作疏而其義益晦徐彥疏公羊空言無當賈孔禮

疏亦少發明近人如曲阜孔氏武進劉氏謹守何氏之說詳義例而略典禮訓詁歛金氏程氏習鄭氏禮顧其所箸書往往自立新義顯違鄭說先舅氏怒然憂之慨然發憤其於公羊也思別爲義疏章比句櫛以補徐氏所未逮其於其禮也思舉後儒之背鄭氏者一一駁正之惜晚年病風精力不逮僅成公羊禮疏十一卷禮論百餘篇卓人行將校文東觀會議石渠讀生平未見之書以續成先舅氏未竟之志是則余所深望知卓人亦必有樂乎此也癸卯七月儀徵劉文洪

閏七月代阮伯元撰重刻舊唐書序

青集卷五

有唐三百年正史所關最鉅後唐長興中詔修唐書至後晉開運二年方纂成奏上五代會要中但言書付史館而未述刊版之事宋嘉祐五年頒新唐書於天下而舊書遂不甚行郡齋讀書志及直齋書錄解題雖皆載其書而不言始刊之歲月是北宋以前之舊槧其有無固無從考證明嘉

靖乙未餘姚聞人詮督學南畿念舊書刻本漸少懼其就湮於是徧加尋訪得紀志於吳縣王延喆家得列傳於長洲張汴家其書乃南宋紹興初年越州所刻卷後載有校勘姓氏舊唐書之流傳於明代者以此爲最古而卷帙尙有闕佚復假應天陳沂長洲王穀祥所藏本彼次補葺始爲完書刻未及半而詮以奉諱去官繼其任者請諸撫按與郡邑各官捐俸倡率凡歷四年而後告成其裒聚與刊布之難悉詳原序特當時聞本所據之書止就殘篇斷簡蒼萃而成初非全部故魯魚亥豕之文夏五郭公之句正復不少論者惜其未盡善焉我朝稽古右文度越前代乾隆四年敕武英殿校刻此書聞本脫誤之甚者逐條釐訂各附考證於每卷之後及四十七年編定四庫全書特置此書於正史而庋藏於三閣閣本之考證又較殿本加詳惟是閣本但繕寫而未發刻讀者旣艱於傳鈔殿本列於二十四史之內坊肆間罕有單行者寒素之家購求匪易而開版久亡其

書尤爲難覓甘泉岑紹周提舉建功嗜學好書尤喜鐫刻古籍其友江都

梅蘊生植之勸其重刊此書遂慨然獨任之延江都沈與九齡殷時若煥

凌東笙鏞儀徵黃聖臺春熙分任校字之事全書字句悉以殿本爲主其

間有刊刻小譌爲人所共知者即隨筆改正外此則不敢妄改至於行款

書式則仿照汲古閣史書蓋毛氏所刻十七史久已風行海內而唐書有

新無舊故特補其所未備也復延甘泉羅茗香士琳儀徵劉孟瞻文洪及

其子伯山毓崧句容陳卓人立排列各本討論群籍得校勘記共若干卷

凡殿本閣本之與聞本異者一一臚列並登載其考證而沈氏新舊合抄

所辨析者亦附見焉若夫北宋初年太平御覽冊府元龜等書皆成於歐

宋未修以前其引唐史確係劉書所據實最初之本足以補正聞本者不

可校舉皆採而集之他如通典通鑑唐會要文苑英華以及十七史商榷

廿二史攷異之類可以互證參訂此書者亦廣爲尋校加以斷制其體裁

義例悉遵殿本閣本之成法而推廣引申以竟其緒蓋殿本之總校爲沈歸愚尙書其自作考證跋語云蒐羅未備挂漏良多閣本之分校爲邵二雲學士其集中所載提要云參核攷定尙有待耳誠以官修之書人心不齊議論多而成功少每致卒業無期故但能略舉大端開其門徑而已後人若不由一反三因源及委其何以成前賢未遂之志哉今岑氏捐資旣勇任事亦堅能集衆長而成鉅業昔元童時讀文選汲古閣本每慨然慕毛氏之爲人毛氏之名今亦永垂藝苑此毛氏之福也毛氏有此名有此福而明於事者能效之則今岑氏是也揚州有力能刻古籍者甚多而願者究少則以此事亦須有讀書之性情嗜好與辨事之才識福分談何易哉是書始刊於道光壬寅九月告成於癸卯七月計未及一稊而粲然大備衰年見此洵爲快事故樂得序之道光癸卯閏月乙未予告體仁閣大學士晉太子太保揚州阮元序

學士晉太子太保揚州阮元序

九月二十四日梅蘊生卒年五十青集卷十

十月撰夏進庵所輯海陵文徵後序

萃一郡一邑之詩文以爲集者六朝以來已有之而其書多不傳其傳者北宋孔延之會稽掇英總集南宋董弁之嚴陵集然二集體例凡有關於本郡者即錄之不盡土著之人明程敏政新安文獻志其甲集六十卷皆其郡先達詩文故當時推爲鉅製至於萃一邑之詩文以爲總集其最著者元汪澤民張師愚所同編之宛陵群英集然有詩而無文明張應遴海虞文苑詩賦雜文莫不悉載然所輯者僅有明一代之文即明一代之中又略於遠而詳於近論者謂時代既近牽於鄉曲之恩怨不免有所濫收凡輯一鄉之文者均不免此失甚矣編集之難也吾友泰州夏君退庵輯海陵文徵正集二十卷自張懷瓘至湯治昭共七十二人凡爲文四百六十篇其蒐采之勤亦云至矣而吾所歎服者尤在於抉擇之精且嚴也邑

中有僑寓數世可稱土著而籍貫仍隸他邑者則列于附錄之中而不入正集東臺自乾隆三十三年由泰州割出分置今錄東臺人之文斷自乾隆戊子以前又集中所采輯者大率有關於地方利病及闡揚忠孝之作凡風雲月露之辭概從刊削即墓志行狀傳述亦必人屬名賢事關倫紀而後采入讀其凡例可知其體例之善矣退庵博學工詩撰述甚富海陵文徵之外又有附錄十二卷詩徵十六卷泉譜八卷筆記十六卷而其所最注意者尤在於此編樣本甫寫定而退庵遽歸道山喆嗣子猷嘉謨克成先志節齋衣食以賞付其從兄子猷嘉穀來郡付梓是皆佳子弟也刻既成屬文淇爲之序文淇與退庵交最久而先母氏浚系出僉憲之後僉憲爲海陵鄉賢退庵凡例中謂浚僉憲舊業堂集關係桑梓最爲切要者也挂名簡末有深幸焉

夏退庵名荃泰州人行實未詳

此月代阮伯元撰張石州所著魏延昌地形志序青集卷五

魏收所撰魏書地形志二

抄本
作三

卷簡略太甚其敘州郡不述太和全盛之

規轉錄武定分裂之制識者病之平定張君穆著有延昌地形志一書抄本

此下有精博
之至四字其抄本無
此字

大旨謂魏收書乃東魏之志與北魏無涉於道武

太武建國之模孝文宣武勦垂之業一字不紀而徒貢諛高齊自來志書

抄本書
字作家

無此荒謬乃博采旁稽重事釐訂凡古書及金石遺文有涉及魏

事者必詳采之西北陂唐

抄本唐
字作塘

堰澤中尉紀敘最詳今并攷其興廢及

見今情形冀後來者有所取法收志譌字甚多以酈氏水經注及各地志

訂

抄本訂
字作正

其譌脫有總圖有各州郡圖載每卷之首余略爲繙閱洵爲抄本

此下有
屬字

實事求是之書其中尤精確者如并州上黨郡之石井關收志沿

班志上黨郡有天井關之文不知漢上黨郡南逾陽阿魏上黨境南不過

元氏乃改繫之建興郡高都下并州平陽郡之禽昌縣

抄本此下
有收字

云即漢

晉之北屈不知漢晉北屈縣在今吉州東北魏禽昌縣在今平陽東洪洞

東南相距絕遠斷非一地並抄本並字皆作并字推詳其致誤之由抄本此下有又字永安

郡平寇縣有雞頭山神祠謂即今忻州抄本無忻州二字繫舟山之抄本無支阜

繫舟雞頭聲轉最近浮陽郡章武縣有大家姑祠或云麻姑神據寰宇記

清池縣有麻姑城而水經濁漳水抄本無水字注清河又東北逕抄本無姑邑南俗

謂之新城俗說麻姑蓋即由傅會抄本無姑之名而起抄本此下有也字麻義相通

又此書雖為魏志而作兼為讀水經注者示其表畷故凡與酈注相涉者

每不憚詞費然亦不意存左袒如太倉翟泉則從伽藍記而不從酈氏之

說至於戴氏所校之本未免意為刪改如收志濕沃縣有后父城即溲水

注之后輔城近本后譌作石戴氏不知取證收志而改右為左凡若此者

亦一一辨正之其繫以延昌者據初學記引括地志云魏孝文帝都洛陽

開拓土字明帝熙平元年凡州四十六鎮十二郡國二百八十九矣熙平

者宣武延昌四年之後一年抄本有也字元魏之盛至此已極故斷自延昌也

余於嘉慶十五六年間抄本無問字在京師文穎館總閱全唐文時館中宮事

於永樂大典中抄得古洛陽圖數紙內有後魏洛陽宮城圖金墉城圖所

載供殿樓觀甚詳並有李彪崔林長孫稚鄭道昭諸宅其圖非後人所臆

造抄本此下有曾摹刻於版五字試取觀之倘亦有所裨助焉道光二十三年冬十月揚

州阮元識于怡志林泉之館

十二月朔撰汪醇卿所編廣陵思古編序

吾友留心於鄉邦文獻者於淮安得丁君儉卿寶應得劉君楚楨泰州得

夏君退庵三君於其鄉先輩軼事遺文殘編斷簡搜羅宏富積三十年之

力以成書楚楨所採輯者有寶應圖經若干卷儉卿輯山陽詩徵二十四

卷退庵輯海陵文徵二十卷詩徵十六卷儉卿楚楨之書成而未刻退庵

已歸道山其哲嗣先刻其文徵余既爲之序矣今同邑汪君醇卿以廣陵

思古編見示屬爲之序此余所欲爲而未暇爲者也猶憶邵伯揚學博刻
婁東雜箸阮相國爲之序云昔年撰淮海英靈集時但求之於詩而未求
之於文彼時若續用力於各邑各家之遺編故帙選擇而成一書則故家
遺俗嘉言善行必斐然可觀惜祇力於詩僅以其餘力爲廣陵詩事數卷
而已蓋深歎廣陵遺文之未編也適相國來館中余醇卿此編代爲就正
相國細加繙閱深嘉醇卿之志謂當更加搜輯以成鉅觀因即述余向所
傾倒於三君者並今相國之言以識簡末道光癸卯十二月朔同里弟劉

文淇撰

是序青集未收

是月撰黃春谷所著夢陔堂文集序

青集卷六

吾鄉黃春谷先生早負重名與焦里堂江鄭堂鍾保岐李濱石諸先生聲
應氣求極一時之盛文淇童年在家塾中已飶聞之後讀漢學師承記謂
先生天資過人爲漢儒之學篤志研究得其精微通歷算能辨中西之異

同又工詩古文自出機杼空無依傍寓神明於規矩中不屑爲世俗詩文者也心竊儀之及聞汪孟慈言先生著有讀周官記讀毛詩記各若干卷於是嚮往倍切時先生遠宦粵西無由親炙比自粵歸孟慈又入都中尙以不得階主未敢造次請謁而先生忽偕梅蘊生過訪因招同羅茗香劉楚楨王西御吳熙載王句生常集蓼園爲文酒之會暇又至余館中縱談今古輒移晷刻自癸未至壬寅歷二十年之久是時先生曩日講學諸友零落殆盡所常往還者祇文淇輩六七人先生篤忘年之誼繾綣綢繆每有所作輒舉以相示竊見先生嗜學之專有非寒畯所能及者宜乎所造之深邃也先生於人事酬酢外終日坐一室中羅列群籍徧爲探討心有得奮筆疾書俄頃千言夜則燃二巨燭冥情搜索必四鼓乃寢率以爲常其夜讀之况詩集中每自道之江氏所謂篤志研究者誠哉其篤志也當初見先生時請讀所著詩禮劄記先生答以祇有草橋尙未成帙厥後稿

燬于火先生亦不以介意蓋其所專致力者在于文說經說文說已刊行者十一篇經說百餘萬言尙未編次而大指已具於文集中作文說經說時詩文亦不多作就詩文二者論之先生素以詩自許未嘗以文自豪即與同人談藝亦論詩至多而論文絕少然觀文說第一編論文章關繫至重首詳文之體用次述文之藻績聲韻而要歸于措辭不詭于正持論極爲精確先生固深于文者集中諸作多直抒胸臆無不達之辭亦無不盡之意融會古人神理而不規規然襲其迹象江氏所謂空無依傍者誠哉其無依傍也公子善庭刻文集旣竣事屬爲序其大凡文淇紬繹全書深歎江氏之所稱道者爲得其實因推闡其說以識簡末道光癸卯季冬儀徵後學劉文淇撰

按此序與刻本夢陔堂文集所錄小異

是月河道總督潘雲閣招先生等四人屬以校書因赴袁浦

按聲遠堂文鈔卷二同舟守歲圖序云歲在昭陽月惟嘉平河帥潘雲閣先生駐節袁浦介要劉孟瞻明經楊季子上舍及余昆季四人將有借寫閣書對正百家之業爰因三冬歸餘俗務多暇拏權往謁刻期過返

按潘錫恩字芸閣安徽涇縣人嘉慶辛未進士授編修大考第一擢侍講學士道光二十三年再任南河道總督在任十載無河患二十八年以病回籍同治六年加太子太保銜卒於家賜諡文慎續碑傳集卷三十三有傳

回里時恰值除夕泊舟寶應之汜水鎮王西御作詩並命其子瑟雲繪圖記事屬先生以序青集卷四除夕同舟守歲圖序

是歲張石州致書先生論魏延昌地形志並求爲序國粹學報第六期

書云孟瞻先生執事穆定于下月三日偕茗香同舟北上茲將拙著延昌

地形志前八卷

纒三分之一

呈誨並求賜敘鄙著此書因魏收書乃東魏之志

與北魏無涉讀水經注者偶一援及輒成歧誤且于道武大武建國之模
孝文宣武翦垂之業一字不紀而徒以貢諛東魏張貢諛高齊之本自來
史家無此荒謬故爲博采旁稽稍還元魏舊觀于司州恒朔十二鎮三事
蓋殫三年之力然後得其梗概焉竹汀詹事謂地形志當斷自太和穆乃
斷自延昌者案初學記引括地志云魏孝文帝都洛陽開拓土宇明帝熙
平元年凡州四十六鎮十二郡國二百八十九矣熙平者宣武延昌四年
後之一年也元魏之盛至此已極又通鑑梁天監十年下云是時梁之境
內有州二十三郡三百五十縣千二十二是後州名寢多廢置離合不可
勝記魏朝亦然案梁天監十年爲魏宣武永平四年次年遂改元延昌故
訂志以斷自延昌爲允今本收志譌字不可勝校穆以酈注爲經各地家
言爲緯訂其譌挽已得十之七八此書爲讀水經註者通其郵故凡與酈

注相涉者每不惜詞費然不敢意存左袒如言太倉翟泉則伽藍記是而水經注非故卽奉羊以訂酈也戴氏校水經注妄改最多如收志石沃縣有后父城卽漯水注之后輔城近本后譌作右戴氏不知取證收志而改右爲左戴氏又托言據永樂大典實則大典並不作左穆嘗檢大典而知之此不可不訂正也若西北陂唐堰澤中尉紀敘最詳今並考其興廢及現今情形冀後來者取法焉又穆著此書凡古書金石遺文有涉及魏事者必詳采之故有總圖有各州郡圖以載于每卷之首謹陳著書大旨如此伏望裁其違謬而賜之敘幸甚感甚穆再拜

按國粹學報載記者恐劉光漢即劉師培識語云案石洲先生此書係癸卯過揚

州時所作而延昌地形志之體例悉載于書中先生又有延昌地形志自序刊入身齋文集中可與此書參觀也記者識

二十四年甲辰 五十六歲

十二月二十九日姚配中卒年五十三藝舟雙楫卷八

是年與同人校勘舊唐書舊唐書校勘記序

是年撰清故貢士梅君墓志銘青集卷十

君諱植之字蘊生姓梅氏祖諱訓自宣城徙江都考諱徇積德在躬鄉黨稱長者幼孤育於其舅范氏范以爲嗣及長娶於黃生子某即以之繼舅氏後而已歸宗繼娶於胡乃生君君年十二已能爲古今體詩二十學駢儷之文博覽經史工書善琴而所嗜尤在詩性簡傲凡鄉里先達及流寓名公有所招邀未嘗輕造其門必歷久知其學實勝己乃執弟子禮事之朋輩所心折者僅十數人視世俗齷齪之士蔑如也家貧無書所讀經注及古文詞率手自鈔寫偶購舊唐書殘本展轉借全帙錄之二句而畢余交遊中多勤學之士其最攻苦者甘泉薛傳均子韻於百憂中手不釋卷儀徵汪穀小城病至咯血誦讀自若而君實似之君中歲疊遭考妣喪未

除服而妻許氏又卒家室蕩然其愁苦抑鬱無聊賴之狀一寓於詩余每不忍卒讀勸其少輟君諾之而莫能改然君即不事吟詠而所處爲生人極艱身非金石摧折之斬艾之欲求無死不可得已余固憂君之不永年也而君竟以肺疾卒悲夫繼娶黃孺人結縭甫七歲生男女各一皆不存沒之前夕新舉一男君猶強撫視之名之曰毓曾未匝日縗絰一襲加於文祿嗚呼可哀也已君由揚州府學增生中式道光己亥科舉人生於乾隆甲寅六月二十日卒於道光癸卯九月二十四日春秋五十即以其年十二月十二日葬甘泉縣施家沖祔其考處士君之墓君詩近體主少陵古體則導源康樂駢文宗江鮑而參以庾徐哀豔散行文亦雅有歐曾矩矱所著嵇庵詩集六卷友人王君瓚華梓行之其續集四卷文集二卷則門人上元黃國華所刻也江都薛壽及君妻姪儀徵黃春熙亦嘗受學於君謂君之學行不可無所稱述伐石刊詞埋諸幽壤以渴葬不能遠求鉅

公之文而丐文於余余文何足傳君君之詩文其必傳於後則無疑也爰爲銘曰

君志之高深兮飲清風而餐白雪也君學之勇決兮挽六鈞而徹七札也謂韞于中宜有所設施兮奚出門而車軸折也惟遺編足以垂後兮芳馨其不滅也

二十五年乙巳 五十七歲

二月六日孫貴曾良甫生左龔集卷六先府君行略

按劉容季氏來書云貴曾字良甫一字少匡副榜貢生候選州判卒於光緒二十四年三月初三日年五十四

四月江西撫署揚州水道記四卷

五月朔撰文學方君傳青集卷八

君名申字端齋本姓申氏舅氏方取以爲子故從舅氏姓而以申爲名其

世系詳余所撰方節母家傳中君少孤家貧傭書於外以所得錢奉節母
甘旨備盡色養室中極狹母歿徹去床几僅容一棺時久雨不霽屋恒漏
君以席覆棺差免滲淋晝夜坐臥於其側衣服沾濡不離苦次如是踰月
始克舉葬既竣事即置几筵於室中以奉主遇時節及忌日必從食肆中
市羹飯置主前祭之雖祈寒暑雨未嘗輟懷慶太守汪君孟慈謂君之孝
不愧古人故表君之墓曰孝子太守即節母之族弟也君雖以傭書廢業
而素通文義人以藁本倩君傳寫者大率多塗乙難識君悉能辨之且爲
之校正誤字余舅氏凌曉樓先生重其爲人命其子鏞師事之道光己丑
舅氏卒時鏞方八年余携之歸而仍延君課鏞讀君訓誨懇摯終日坐書
室中於世俗之紛華泊然無與余因無劉君楚楨勸君習制舉業時君年
已踰四十矣甫應童試屢見黜於有司而學益進至戊戌冬督學祈公按
試揚郡君始以經解見知拔置闔郡第一督學劇賞之正場試律以人間

重晚晴命題蓋爲君發也補儀徵縣學生員庚子秋赴試江寧積勞成疾歸而益劇卽於十一月三日卒年僅五十有四祔葬於節母墓側次年浚鏞亦以經解受知於督學毛公入江都學而君已不及見矣君自悔晚學故致力棊勤其最精者尤在周易朝夕鑽研未嘗釋手君以張氏惠言約舉鄭氏易象而未及其他毛氏奇齡引諸家易象而尙多挂漏因徧閱諸家書有涉及易象者咸摘錄之成諸家易象別錄一卷又以易家之言象者以虞氏爲最密惠張二家所述猶未完備因詳核虞注之引逸象者縷折條分成虞氏易象彙編一卷又以後儒解易罕引說卦傳因博攷古注參閱諸緯與春秋內外傳注援據易說卦傳者排比其次第各繫於本文之下成周易卦象集證一卷又以春秋時列國卜筮必據互卦以與正卦相參因尋繹漢儒之所言者反覆求其條理而知互卦之法正例有七附例有二成書一卷名之曰周易互體詳述又以卦變之法傳之已久言人

人殊無所統貫因參伍攷訂以深求其義例之所在成書一卷名之曰周易卦變舉要是爲易學五書君之於易可謂勤矣古之士懷才抱異阨塞而不遇者何可勝道然如君之少苦流離中歲困躓終其身寂寥寡歡者蓋亦尠矣君以貧故未婚娶族中又無可爲君後者君之祀斬焉人道之窮至君而極世有跖弛之士或恃才傲物頽然自放於禮法之外其致窮也有由君則抑然自下束脩安貧而摧抑亦若是之酷天道其果可知也耶今孟慈太守悲君之遇爲梓遺書俾垂久遠然則君之所以不朽與天之所以彰君者其在茲乎其在茲乎

是年與同人成舊唐書校勘記六十六卷

按舊唐書校勘記六十六卷此年竣功先生所任自卷一至卷十本紀自卷二十至卷二十三地理志自卷六十一至卷六十六列傳凡二十

卷伯山所任卷三十三十四音樂志自卷二十四至卷二十六職官志卷

二十八卷二十九經籍志自卷四十八至卷六十列傳凡二十卷羅茗
香所任自卷十五至卷十七歷志卷十八天文志卷十九五行志卷三
十食貨志自卷三十二至卷三十九列傳凡十四卷陳卓人所任卷十
一卷十二禮樂志卷二十七輿服志卷三十一刑法志自卷四十至卷
四十七列傳凡十二卷

是年編修汪醇卿訪得鮑孝女墓於京師因寄書先生而屬爲之傳先生撰

鮑孝女傳 青集卷八

是年代阮伯元撰江甘貞孝節烈總坊錄序 青集卷五

序云嘉慶十一年元與伊墨卿太守於縣學節孝祠中議立四碑將江甘
兩邑待旌貞孝節烈婦女姓氏鐫諸碑石其時未有請建總坊之例故創
爲此舉以翼垂諸久遠十六年修府志時即據此碑采入志中道光七年
武進陽湖兩邑紳士請建總坊得旨允行於是江蘇各屬彙請者次第舉

行而江都甘泉兩邑亦於二十二年由學轉詳請建總坊禮部議准奉旨
依議旋經樹立總坊於節孝祠前並於祠內設位致祭而旌表姓氏總錄
尙屬闕如汪編修廷儒輯爲總錄捐貲付梓茲請暇歸省請序於元元惟
總坊之立前此所無今奉旨允准直省通行有以見聖朝風化之盛卓絕
千古故褒錫之典爲曠代所未見也錄中首載公牘一卷次列兩邑新旌
姓氏凡一千四百八十六人分爲四卷建立總坊後又續采得合例旌表
者一卷以待續請而元所立之題名碑及府縣志所載未請總坊以前已
蒙旌表者將學冊神主參互比對各爲一卷其有筆畫訛誤姓氏岐複者
詳爲辨正而事實見於各家詩文集小志者亦間爲采輯以備續修志乘
者有所徵從編修好善之意有足嘉者元故樂得序之

二十六年丙午 五十八歲

九月初三日邀晉江陳慶鏞頌南與岑紹周羅茗香楊季子等偕遊華清宮

慶鏞字乾翔頌南其別字晉江人道光壬辰成進士改翰林院庶吉士官至中議大夫掌陝西道監察御史候選道咸豐八年八月三日卒於泉州團練公所春秋六十有四著有籀經堂類稿齊侯鬯銘通釋其三
家詩攷說文釋文校本古籀攷穀梁通釋屬草多未竟續碑傳集卷十

九有傳

九月十六日與吳熙載王旬生等泛舟遊平山堂聲遠堂集卷二

冬十一月代阮伯元撰劉孟涂所著廣列女傳序青集卷五

桐城劉君孟涂余久馨其名未識其人嘉慶丙子余撫中州時孟涂來見以詩文就質其詩才高筆健接跡前賢駢體獨出機杼余甚重之別後遂不相見而時以詩文函寄後聞其客死亳州亦絕不知其家消息丙午冬其子少涂繼來謁始知其詩文集四十卷爲其友姚君伯山所刊先是孟

涂以其母夫人吳氏撫孤守節之故輯廣列女傳二十卷藏諸篋笥尙未
付梓孟涂卒時少涂甫三齡病且殆孟涂之喪適歸其配倪孺人大慟曰
吾夫既客死於外而子之病又甚危篤吾夫殆無後矣即自剄不殊至人
定後卒自經死去孟涂之卒才百日今少涂幸得成立年甫踰冠即橐筆
走京師節省館穀刻成此書以成父志以彰其君母之烈可謂偉然佳子
弟矣孟涂此書之例斷至明止余謂二母之節烈不可沒也少涂當輯二
母事實即以祖母殿諸節婦之後以君母殿諸烈婦之後誰曰不宜孟涂
尙有未刻書八種論語補注三卷大學正旨二卷中庸本義三卷孟子拾
遺二卷續集六卷外集六卷別集六卷詞一卷共二十九卷皆少涂所搜
輯錄有清本爲著其目於此

劉孟涂名開字明東孟涂其一字又作孟塗桐城人師事姚惜抱學詩
古文與同門方植之管異之梅伯言有方劉管梅之稱道光四年閏七

月十四日卒於亳州志局年四十一續碑傳集卷七十六有傳

按此序云始知其詩文集四十卷然刻本劉孟塗集文集十卷駢體文十卷詩前集十卷詩後集二十二卷凡四十四卷也

冬撰周烈女傳

青集卷八

是年刻薛子韻所著閩遊草一卷

按聲遠堂文抄

卷二

薛子韻閩遊草後序云檢楮葉於緘滕空藏手墨

越今十有七年素交劉孟瞻明經慨駒隙之易流謂鴻泥之可惜爰取

劉楚楨大令舊所錄存詩若干首總爲一卷重付影寫錄之梨板

是年與伯山爲岑紹周從事輿地紀勝校勘

按舊唐書校勘記岑紹周自序云校勘記六十六卷刻旣成而此自序

作於道光丙午仲冬然伯山代阮伯元所撰輿地紀勝序通集卷七云

是歲甘泉岑紹周提舉建功方重刻舊唐書延其友分纂校勘記而自

輯逸文擬俟其告成卽從事紀勝癸卯春初奉舊唐書謁余求序且言願刻紀勝全書請先假歸影鈔然後授梓余欣然許之未幾余舊居福壽庭第爲鄰火所焚凡選樓書籍分藏於彼者悉燬於一炬而紀勝以借鈔之故巍然猶存洎影鈔旣畢紹周復延儀徵劉孟瞻文洪及其子伯山毓崧纂輯紀勝校勘記而自補鈔闕文戊申孟夏舊唐書校勘記刻工已竣逸文亦垂欲開雕將次第及於紀勝而紹周遽亡乃舊唐書校勘之功已竣此歲應當着手輿地紀勝校勘

二十七年丁未 五十九歲

正月王子涵調儀徵縣知縣謀重修儀徵縣志

按重修儀徵縣志阮序云丁未孟春司馬王公來宰儀徵政通人和循聲懋著下車之始卽詢及縣志知已四十餘年未修慨然以身任之

王子涵名檢心原名立人子涵其字河南南陽人同治八年五月卒年

六十五著有易經說約春秋本義孝經本義四書存真禮傳合鈔二十餘種已刊有王子涵全書續碑傳集卷三十六有傳

五月十六日門人薛壽父長慶吉人卒年七十五先生爲撰薛君家傳青集

卷八

八月三日汪喜荀卒年六十二汪孟慈先生行實

九月十六日孫富曾謙甫生

按劉容季氏來書云富曾字謙甫光緒戊子科舉人揀選知縣生於道光二十七年九月十六日卒於民國十七年十月二十六日年八十二己卯孟春余至揚與謙甫門人蔣太華氏面晤獲聞其爲人與學風劉容季氏蓋謙甫之哲嗣也

九月十九日同郡金雪舫邀同人雅集樗園爲展重陽之會先生父子與焉金以畫圖示先生屬序伯山代撰展重陽樗園雅集圖序通集卷七

按金雪舫名長福雪舫其字高郵人貢生父芸工書法雪舫幼聰慧少
一目博洽經史尤深選學屢試不售淡於進取然好學至老不倦著有
廣陵新舊事小墨莊詩話及駢體古文古今體詩數十卷咸豐三年後
揚郡三次失陷與當事辨團防盡力保奏以教諭加提舉銜卒年七十
五續纂揚州府志卷十三

是年先生父子纂輯輿地紀勝校勘記成書五十二卷十二月伯山代先生
撰輿地紀勝校勘記序通集卷七

二十八年戊申 六十歲

夏岑紹周卒

按輿地紀勝序通集卷七云戊申孟夏舊唐書校勘記刻工已竣逸文
亦垂欲開雕將次第及於紀勝而紹周遽亡又舊唐書逸文序通集卷

五云紹周復就諸書所引舊唐書與今本不相比附者蒼萃參考爲舊

唐書逸文十二卷戊申夏甫經甫定而紹周遽亡

夏知縣王檢心開局重修儀徵縣志延先生爲總纂伯山與分纂

重修儀徵

縣志

按重修儀徵縣志阮序云丁未孟春司馬王公來宰儀徵政通人和循聲懋著下車之始卽詢及縣志知已四十餘年未修慨然以身任之且議將新舊各志一律重修戊申仲夏商之於余又云王公及纂修諸君頗肆余說開局未及期月編次已有端倪又張丙炎序云經始於道光戊申卒業於咸豐壬子成書五十卷

八月十二日先生覆書楚楨

覆書橋川子雍氏所藏手札云前缺介伯輩爲社會亦尙不間斷淇所編

儀徵志將來成書亦斷不能及尊公之寶應圖經惟爲岑氏所撰校勘記中之帝紀地志彙傳三種二十卷尙不大謬現已刻成惜卷帙太多兼之

道遠不獲侍奉寄耳現在岑氏昆仲復刻王象之輿地紀勝業已開工大約明年可以成功此書照影宋本刻其有訛誤伊現屬小兒爲之校勘近來肯刻古書者甚罕岑家叔侄尙有根器也此覆並頌侍安文淇手啟八月二十日

九月二十六日戴文燦卒年六十五

戴文燦傳詳道光三十年

十月先生與楊季子王西御王句生有袁浦之役歲暮撰除夕同舟守歲圖

序青集卷四

序云呂氏春秋季冬紀注云前歲一日擊鼓驅疫謂之逐除歲除之名始于此其夕即謂之除夕六朝以前除夕見于題詠者甚鮮間有一二作者如宋張望有蜡除詩梁庾肩吾隋薛道衡均有歲盡應令應教詩然皆不名爲守歲守歲之名始于唐太宗徐堅初學記載其二詩其一詩云共歡

新故歲迎送一宵中又一詩云對此飲終宴傾壺待曙光則亦如今之俗
達旦不寐矣其後蘇東坡又因守歲廣爲饋歲別歲詩三首以寄子由時
東坡官于岐下歲暮思歸而不可得故爲此三詩以寓慨其饋歲詩云亦
欲舉鄉風獨唱無人和感子由不在側也道光癸卯冬十二月余與楊季
子暨王君西御句生昆仲于役袁浦回里時恰值除夕泊舟寶應之汜水
鎮西御作詩並命其子瑟雲繪圖紀事夫西御之詞亞於玉局句生之學
不後穎濱矧疇昔之會無兄弟離別之苦有友朋相聚之樂視東坡酸鼻
獨吟者其境固不同矣昔晉嵇含有娛蜡賦其序云大蜡之夕雖天下同
有攜金蘭以齊馨利貴得意以遣榮勢孰我尙哉竊謂此役方之嵇生可
以無愧宜西御以此自豪也西御作此詩即屬余序之余諾之未果作戊
申十月同人又有袁浦之役舟次邵伯者三日西御續作一詩來責前諾
余以傭書少暇未能應命歲暮歸來稍得餘暇薄田數畝已納官糧館穀

所餘聊資卒歲既無租吏之催何必謫臺之避惟茲宿諾久未能償又逼歲除皇然負疚吮墨伸紙拉雜書之以呈西御正當柏酒初開之時辛盤乍薦之候西御覽此當滿飲一巨觥也

十二月撰周烈女傳紀後

青集卷八

是年寄書知縣王子涵論重修儀徵縣志體例

青集卷三

與王子涵司馬論修縣志書云竊惟修志一事先定體例而體例之定須將所有舊志參互考覈擇善而從現修儀徵新志以嘉慶府志爲法分門別類略仿其例誠爲盡善然亦有當議變通者府志以嘉靖維揚志爲最古阮太傅處藏有一部癸卯年燬於火世間遂無其書前此修府志時采用雖多然散見各門其原書體例無可窺尋考古者深以爲憾儀徵舊志除陸志顏志外康熙三十年馬公章玉續修之胡志已不可多得文淇訪之郡中藏書家得康熙七年胡公初修之一部又得雍正初年李公初修

之一部皆阮太傅所未見者舊志之難得如此嗣又覓得隆慶申志一部揚州府屬八縣江都爲附郭首縣而縣志僅有國初所修者絕無明代之書而儀徵則有隆慶志誠不可不愛惜之也太傅前撫浙江時顏公修志請定凡例太傅勸其存留舊志續修數卷又屬江鄭堂先生別爲校補陸志一冊附于顏志之後及文淇館於太傅處亦嘗論及修志之事謂不可掩蔽前人此次修志擬推廣其意而變通其法現所修各門首隆慶申志次康熙胡志次康熙馬公續修之胡志次康熙陸志次雍正李志次嘉慶顏志次今日新增其有爲各志所無而此次新增者如鹽法事略之類不妨照府志等書新立一門而注明其故

文洪前閱鹽法志所加籤條亦謂當采申志胡志食貨之文加以新

采各書別立鹽法一門惟陸志顏志原列於官署門及秩官門者不必移入鹽法當注明互見以存其舊耳 前此曾致書局中

與諸君子商酌第約略言之今特細爲剖析如能條列各志於前有五善焉書莫善於存古古書存世頗少邑志之舊者更少隆慶申志康熙胡志

實爲不概見之書更數十年後恐此二書亦難於永存卽存亦若滅誠以
原板久失邑中人士不能盡見其書也今將申胡各志彙列於前後人讀
新志者即可得此二書之崖略則申胡二志雖滅猶存馬李陸顏四志亦
並傳不朽其善一也事莫貴於核實邑乘之得失必具列其書而後可知
若空言某志善某志不善其得失之故不能明也今詳列其書逐條核對
而得失自見

卽如田賦門申志載洪武戶若干口若干永樂以下數朝戶
減若干口減若干胡志但言永樂至正德戶口各有增減陸

志因之以前而注明胡陸二志所改者於下則胡陸二志之得失見矣人
志原文於前而注明胡陸二志所改者於下則胡陸二志之得失見矣人
物門胡志所收最濫如廣陵吳晉等皆係江都人而胡志僅據儀徵有廣
陵鄉遂濫行收入不知江都亦有廣陵鄉也今詳載胡志原文而加按語
於後則申志之所以不采陸志
之所以徑刪二志之嚴謹見矣 既不掠人之美亦不爲人受過其善二也

修志之法貴精密而戒複漏聚則易精易密散則易複易漏若將各志析
散另編恐或有新志本於舊志而采新遺舊者亦或有新志詳於舊志而
采舊遺新者且恐有彼此俱遺及彼此複見者縱悉心考核難保無疎舛

之虞今條列各志於前則無重複遺漏之弊其有詳略互見者不妨隨條附注以求精密其善三也凡修書固不貴於速成然亦不可遷延以致半途而廢目下志局所捐經費已極艱難加以城郭被水辦理賑務捐項斷不能加多而同局諸君子率多寒素皆有館事羈身若另立規模必致曠日持久今以前志爲主後志與前志同者無庸複述惟遇有詳略互異者然後注明似乎剋期可成事半功倍其善四也夫作事期於易成而立法貴乎能繼歷數十年後地方情形固有今昔之不同而邑中人文蔚起其應紀載者必逐漸加多若不隨時纂錄恐年代久遠必有湮沒不彰之患各地方修志鄭重遲延者多因經費難籌誠以續修一志必另開生面故築室道謀事大難舉若新志井井有條作法貽後閱數十年如有續修即增補數卷附於新志之後則易於集事無用更張觀今日之力存舊志知後日之必存新志後之視今不異今之視昔其善五也且地理志以漢書

爲最古其首列禹貢全篇次列周禮職方氏一官然後述漢時疆域此即新志備載舊志之例後此郡縣志用其例者如元至順鎮江志各門每先引宋嘉定志是古人已有成例並非自我作古或有嫌其沿襲無所改作者然以各志互相參考加以釐訂並非徑錄舊文况舊志新增分析登載其注明以上舊志者足以見諸君子編次之精根據之確其注明以上新增者足以見諸君子搜羅之廣纂輯之勤則沿舊者不啻更新而新采之功更著矣又或疑年代先後間有倒置者然嘉慶揚州府志列女一門有年代在前而反列於後者實以前次修志時漏未登載後次續修始經補入故耳府志既循舊志次序登載則縣志亦不妨仿此矧正史之中如後漢書內即有補前漢書之遺者仍復各自爲編不相牽涉則時代之說亦不必過拘也以上諸條皆管見所及伏乞核定後飭小史別錄一通遞至書院就正同局諸君子是禱

按先考行略通集卷六云總纂儀徵縣志於編訂則獨肩其全於修脯則僅受其半同鄉諸君子歎爲世俗所難能

是年江夏童石塘濂權離政延先生及楊季子吳熙載王句生注南北史

按汪梅村先生文集卷七南北史補志表後序云往者道光戊申己酉

間江夏童石塘濂太守權離政延儀徵劉孟瞻文洪年丈暨楊君季子

亮吳君熙載廷翼王君句生翼鳳注南北史設局邗城福因庵童濂二

十九年調任兩淮鹽運使行實未詳

是年代阮伯元撰誥授中憲大夫道銜懷慶府知府汪君墓表青集卷九

道光二十八年五月河南懷慶府知府汪君之喪歸揚州即以其年十月

三日權厝於甘泉縣西鄉徐原橋之原先期其孤保和溥熙介徽持狀來

乞表墓之文余少與君之考容甫先生交君又嘗從學於余熟君之行事

不可無以應其孤之請也按狀君諱喜荀字孟慈江蘇甘泉人先世居歙

自唐忠武將軍越國公華始昌其族忠武裔孫承清當北宋時自唐模遷古唐至君凡二十七世高祖鎬京工詩及篆刻始遷於揚州曾祖良澤工篆刻具有家法厚德高風鄉里矜式祖一元江都增廣生矜立名節不苟取子性至孝欽旌孝子父中字容甫乾隆丁酉科拔貢生博聞強識通知古今爲文典正閎麗卓然成一家言國史館儒林傳彙有傳君祖考皆以君官贈中憲大夫道銜河南懷慶府知府祖妣鄒氏妣朱氏皆贈恭人鄒太恭人苦足疾朱太恭人以口吮之病亟割股以進欽旌節孝君初諱喜孫時鄒太恭人望孫甚切禱於神而生君因名之嗣以避九世祖諱更易今名乾隆五十九年容甫先生歿於西湖葛嶺園喪歸君哀毀如成人時年甫九歲朱太恭人親爲課讀比長延同里通儒魏先生彝群丁先生澣韋先生佩金鍾先生懷授以根底之學嘉慶十一年督學莫寶齋先生晉取入甘泉縣學卽於次年丁卯中式本省舉人報捐內閣中書復改捐員

外郎簽分戶部補山東司員外郎監督儲濟倉改湖廣司員外郎欽差東河學習補河南懷慶府知府欽加道銜誥授中憲大夫道光二十七年八月三日卒於懷慶府任君自傷幼孤鄉舉後託病謝絕酬酢博覽群籍於文字聲音訓詁多所究心凡鍵戶三年學遂大進父執王懷祖劉端臨段茂堂諸先生咸加歎賞而君顧歉然自下殷殷請益於政治沿革得失留心講求下筆爲文皆有關世用不作無益之語君官戶部最久其主河南司稿也東河總督奏撥另案工需久經奉旨撙節及三汛安瀾後復請動帑君力言於上官奏駁時河工用度浩繁乾隆嘉慶年間均係攤征于民積欠在嘉慶二十二年萬壽恩詔以前有八十二萬兩之多君亟言于英煦齋相國和奏請豁免其主貴州司稿也兼管各關權稅力主不添關不添稅之議江蘇巡撫咨請以揚州儀徵攔潮閘改駐新城擬增設羅泗閘君以爲揚關統轄南北爲賦稅要地至于分口小閘吏胥多藉稽查以肆

擾害且新城至揚厘四十里已有攔潮閘若再增閘似重徵擾民有傷國體力主議駁載入則例有議增浙海關稅肩挑步擔一例征取者有議以儀徵商船飭令至瓜洲交稅由長江至沙漫洲復遶道至瓜洲不獨舟人不便于行且恐滋賄囑關吏之弊君皆力止其議道光十年正月補儲濟倉監督不置車馬不隨僕從以杜騷擾需索之弊嗣調海運倉監督以丁朱太恭人憂去官十五年入都戶部尙書奏留本部管理井田科主稟十九年保送河工引見奉旨記名蒙召見垂詢科分及在部歷任諸事甚悉有久資老成之諭奉旨發往東河六月到工隨同栗恭勤公防守兩河凡遇老卒多方詢采于隄工泉源漕運賑務靡不悉心講求恭勤公深相倚重所陳機宜皆邀契賞二十一年學習期滿保奏奉旨發往東河以知府用君具摺謝恩蒙召見於圓明園大宮門垂詢東河情形甚悉又問前人有用輒工者否君以黎襄勤之成法對可以堅久掛淤至爲搶險挑溜起

見則輒工亦較稽料更爲得力上嘉納焉陞辭請訓仰蒙垂諭云汝是讀書人學問素好今用汝外任須要實心辦事不可習尙浮華君請謝恩後即馳抵東河七月奉委防守黃河北岸七廳值下北搶險君晝夜搶護不遺餘力化險爲平二十四年中牟河決委掌攔黃大壩君會同都司劉公天保晝夜巡緝獲放火搶奪工料連傷人命匪犯楊元杜栓等二十名嚴治之牟工合龍議敘奉旨賞加道銜二十五年補懷廢府知府下車之始日坐堂皇聽斷凡遇應提之案不徇情面不易時日履任未久審結積案百數十起先是二十三年河內縣民李百幅調戲李遂姐羞忿自縊一案始則其母受賕匿報旣以需索未遂屢控經年案事者疑以和姦久之未決君悉心推鞫盡得其情抵李百幅於法旌李遂姐於朝獄遂平反暇輒巡行郊野勞問民間疾苦懷慶北枕太行南瀕黃河自清化以北武陟以東每屆嚴冬時有劫掠君捐資團練鄉勇民壯時時親率巡查盜賊之風

爲之頓息郡中舊有覃懷書院歲久傾圮君捐廉五百金重爲修葺增建
學舍每值課期必在院終日品隲文藝講貫經史孳孳不倦丙午科鄉試
闔郡中式者十人周嗣敬領解文風稱盛郡境濟河發源于濟瀆廟分支
于栢香鎮東穿郡城至龍澗村入沁此乾隆四十八年所修故道也旋因
沁河灘地淤高水洩不暢河身節節壅滯嘉慶十二三年間濟水盛發下
游爲沁水頂阻旁趨官道匯注成河土名官路河繼又別開南北河一道
導引入黃仍未暢洩每逢大雨溢出爲患河武兩邑互相訐訟君徧詢故
道形勢親履查勘剴切出示勸挑又恐沁水淹入郡城用水旱平測量郡
城一帶至龍澗村水口較之沁河外灘高出數尺可無倒灌之患乃於道
光二十六年四月興工親行督飭將舊河身及四門城濠逐段挑濬深通
一律七月工竣濟河遂復故道計自栢香邨至龍澗東西七八十里得水
澆地一萬二千餘畝郡內西王曲邨舊有河形壅塞已久居民爭水致訟

君親行履勘督飭興工分水六道引沁流以資灌溉得水澆地三千餘畝
河口建閘外加八字石牆以禦沁河伏汎居民立碑頌德名曰新開汪公
河二十六年閏五月大雨浹旬沁舟並漲水高九尺有餘淹及沿河邨莊
三十六處居民大恐君冒雨馳赴搶護自河內天師廟至武陟木欒店百
餘里間督率屬吏竭五晝夜之力將民堤加高培厚又於張莊喫緊處所
捐廉趕築輒壩堤身賴以穩固又親赴被水邨莊散放饘餅分給蓆片搭
蓋竹棚暫避風雨工穩水落始請緩征繼求撫卹大吏入告蒙恩發帑賑
給口糧君又親赴各村莊查勘撫慰目擊情形聲淚俱下災民迎送道左
咸感泣曰此吾儕眞父母也是年饑饉接吟河內濟源兩縣搶糧者衆禁
之不可君出示勸諭富戶有屯糧者酌借與親族鄰里公同登記簿籍俟
歲有秋照償不償者許稟官追給并勸富戶煮粥分路以賑窮民之無告
者由是貧富皆安各縣取以爲式嘗查郡境離水較遠者諭令鑿井輓轆

引汲資灌地畝每行郊外輒就農民諄諄曉諭人皆鼓舞從事故二十六
七年間河北彰德衛輝懷慶三府同時被旱而懷慶府屬獨輕賴君勸脩
水利有素也君體素健年逾六十鬚髮未白自中牟工次掌守大壩烈風
雨雪經秋徂春宿於蘆棚蓆地而臥感受潮濕頻年夏患腳氣然調治至
秋即愈去夏又告愆陽深入太行山步行峻嶺亂石中六十餘里至白龍
潭取水歸郡始得大雨炎天遠道涼霧深宵感受山嵐暑濕兼之積勞遂
至一病不起君生於乾隆五十一年七月十六日春秋六十有二著有國
朝名臣言行錄經師言行錄尙友記從政錄孤兒編且住菴詩文彙凡若
干卷又編集名公先輩所撰傳誌詩文爲汪氏學行記娶范氏誥封恭人
子三長保和江都縣學增廣生員出嗣君從兄塘後次溇熙次介徽俱國
學生考取國子監算學天文生孫一繼善君生有至性每與人稱述先世
懿德輒泫然流涕於容甫先生所著書片言隻字無不析及精微心知其

意又於先生手蹟斷箋敝紙無不寶而藏之歷官中外釐姦剔弊每爲胥吏所切齒在部時主彙與大吏意見不合則面諍不已大吏每以彊項稱之洎爲外官勤求民瘼屬吏每不便君之所爲然君在任時鄰境以漕事屢興大獄而懷慶獨靜謐無事君歿未踰歲歸德彰德諸府縣以辦災不善暨挑河際帑事爲科道糾參大吏俱被嚴議而懷慶屬吏無被訐者則君之治績可知也余次序其家狀擇其大者表於阡且系之以銘曰漕吁嗟汪君亮節高誼處爲孝子出作循吏儒素承家經術飭治勤官而死誰不墮淚伐石表阡我銘無愧

二十九年己酉 六十一歲

八月撰戴靜齋先生傳

戴靜齋先生遺書

傳云先生姓戴氏原名□□避宣宗廟諱改名清字靜齋其先世爲休甯人祖父始遷揚州先生天資穎異自出就外傳性耽典籍凡有關實學者

勤加采錄異同疑似尤所究心著四書典故考辨十二卷自序云漢人談經最詳典故宋大儒視典故爲粗跡空疎者未必不有所藉口我朝文教覃敷名儒輩出即四子書考據者不下數十家流覽之下勤加采錄垂二十載得千有餘條列孔孟年譜及其弟子考于卷首尊古聖也列記載注疏引用沿襲之訛於卷末砭俗儒也餘分十二卷顏之曰四書典故考辨爲朱子諍臣不爲朱子諛臣實事求是前人固言之矣其解論語拜下云臣見之君當拜下者覲禮九聘禮四燕禮十二射禮四公食大夫禮六凡此五禮皆所謂禮也邢疏引燕禮酬賓及覲禮賜車服二事證之未備其解孟子不挾兄弟而友云江氏永云古人以婚姻爲兄弟挾兄弟而友與挾故而問相似余謂爾雅釋親云婦之黨爲婚兄弟壻之黨爲姻兄弟僖二十五年公羊傳注云宋魯之間名結婚姻爲兄弟此江說所本當從之所論皆確不可易而最精者尤在地理如孔子之去魯至衛去宋至陳孟

子之自鄒至梁去齊至滕以及太師之適齊亞飯三飯四飯之適楚適蔡適秦大王之踰梁居岐晉人之由虞伐虢莫不核其遠近計其險夷凡正路岐路之殊陸行水行之別皆一一書其古地證以今名犁然若聚米畫沙俾閱者瞭如指掌眞有功經義之作也又著群經釋地十卷自序云歷來注經者於地理一門不無疎脫昌黎云土地之書未嘗一得其門戶且謂古之人未有不通此而爲大賢君子方欲退而往學予敢矜言此哉况乎儒者足跡不能徧天下徒抱遺編相爭競一有譌錯村夫豎子皆得指而議之此注地理尤難也然拳拳之心莫能自己爰取向所錄存者細心辨析是者仍之誤者正之缺者補之間出己意參訂均釋以今日地名成書經詩經周禮禮記各一卷春秋三傳三卷爾雅論語孟子各一卷他經附見顏曰群經釋地從爾雅舊名亦就閻百詩先生四書釋地推廣之耳其解爾風東山云史記吳起列傳殷紂之國左太行右孟門河北諸山以

太行爲大秦漢以來謂山東山西者皆指太行山。周師自西而東，故曰東山。其解明堂位，鬼侯云孔疏，周本紀作九侯，九與鬼聲相近。徐廣史記注云：鄴縣有鬼侯城，案鄴縣故城在今臨漳縣西四十里。集說以爲鬼方非也。其解襄三十年傳成愆奔平，時云杜說周邑。按說文時，天地五帝所基址祭地，此邑必近周郊祭天處，當在洛陽縣境。其解哀九年傳吳城邗溝，通江淮云，杜注於邗江築城穿溝，按閻若璩云：夫差穿溝疑爲今儀徵舊江口。正漢江都境城亦在大江濱，其解釋山獨者，蜀云案揚州城北有蜀岡，蓋取其一山獨矗也。全書之考稽精審，類此外甚多。此者尙有雙柑草堂古今體詩八卷、古文二卷、駢體文二卷、經史管見四卷、史記說苑新序正誤各一卷、韻辨三卷、左氏兵法集證二卷。惜多散佚，不傳。先生弱冠補儀徵縣附學生，屢試高等，食廩餼。以嘉慶癸酉歲貢生，在籍候選，訓導道。

光丁亥年卒，年六十六。子文超，文起，文越。余應童試時，先生爲認保，余以

師禮事之先生顧折節下交凡所著書屬余校定偶有諍議先生必改而從之余每聳息付梓顧以家書力不能刻今墓木已拱文超等寶藏其書余故詳述先生著書大指俾後之人有所考見焉

十月十三日阮元卒于儀徵年八十六 雷塘庵弟子記卷八

十一月初九日張石州穆卒年四十五 張石州年譜

十二月陳輅卒年三十九 青集卷九

按陳輅字樸生儀徵人道光甲辰舉人先生撰其墓表

是年撰處士余君暨妻姚孺人合葬墓表 青集卷九

按余氏名沅字湘芷揚州人卒於乾隆癸酉十二月十二日年四十一

道光己酉其孫文煥以狀至乞先生爲文表墓

是年應江夏童石塘濂之請在邗城福因庵注南北史

按此書或離兵燹而亡乎未目睹焉惟汪士鐸梅村所著之南北史補

志表佚於兵亂而後再獲梅村所撰補志表後敘云往者道光戊申己

酉間江夏童石塘濂太守權離政延儀徵劉孟瞻文洪年丈暨楊君季

子亮吳君熙載廷颺王君句生翼鳳注南北史設局邗城福因庵余以

家累不克作遠遊乃分任補兩史志表而屬草於里門又云草稿既具

童公即世此本存兩江節署東南兵燹不知所終同治壬申兩淮運使

定遠方公購得此稿劉君恭甫壽曾孟瞻年丈賢孫也證爲拙稿方公

將刊以輔延壽書因介恭甫詢其顛末

是年總纂重修儀徵縣志

是年女夫國子監生田溥光卒劉容季氏膾錄劉壽曾撰亡姑國子監生

田君妻劉孺人墓誌銘

道光三十年庚戌 六十二歲

十一月朔元氏知縣劉楚楨郵書索取近作因仿少陵存歿口號賦六絕句

寄之青集卷十一

懷人六絕句效少陵存歿口號并序云余素少交游自姻戚以外生平相
知至厚者不過十數人就中子韻交最久季懷子敬子駿孟開次之楚楨
儉卿蘊生仲虞賓叔彥之又次之最後乃得石州今存歿各半即其存者
亦散處四方惟賓叔館於揚郡尙得偶相過從適楚楨自直隸元氏郵書
索取近作爰仿少陵存歿口號賦六絕句寄之以懷人爲題故朝夕相見
者如茗香季子熙載西御句生諸君皆未之及云道光庚戌十一月朔日

識

搜羅寶應圖經富

楚楨輯寶應圖經

續補延昌地志詳

平定張石州著魏延昌地志

元氏甘棠

誰薦達石州宿草劇淒涼

丁鴻豪健才猷懋

山陽丁儉卿究心桑梓利病見所著石亭記事

姚信凋零樸學深

旌德姚仲虞深於周易著

有一經廬叢書

多口未妨稱國士苦心何處覓知音

柳氏文章師子厚丹徒柳梅君詩筆勝都官江都梅一經行世迂迴

待賓叔精於穀梁春秋著書七種待刊石貽孤鄭重看蘊生家藏唐貞元田府君石

五色明珠輝璧社高郵孫彥之與莘老同族編四書說苑九苞威鳳耀河東甘泉薛子韻系出河東著說文

答問疏證文選古字通等書珠光久照人將老鳳彩先消遇最窮

廣文有道官偏冷歙縣閔子敬官全椒學博有古君子風公子多才命不猶歙縣洪子駿為桐生師嗣子

苜蓿闌干情自適芙蓉搖落稿誰收子駿工詞有殘荷詞尤佳今遺集不存

大包君與小包君講藝談經迴不群涇縣包季懷撰毛詩禮徵其學鍾阜孤族子孟開治公羊論語之學

墳悲夜月季懷葬江寧金臺旅館悵寒雲孟開客京師館於呂鴻臚宅

楚楨得之賦答載在念樓外集卷一歲抄得孟瞻懷人詩賦答云吾郡

文又儒首推吾宗秀堅貞竹柏懷香潔芝蘭臭與俗寡所諧歲晏今朋

舊吟詩首及余懇懇意良厚封緘遠見貽令我日三復時余方行役房

涿久逗遛常恐集愆尤遑復計去就登高望故鄉陰雲彌四宙日暮百

禽稀天寒萬山瘦臨風訴遠心離情滿襟袖

是年撰清故貢士戴名墓志銘

青集卷十

君姓戴氏諱文燦字蔚華號雲軒先世福建漳浦人高祖諱維瑞貿易六合因家焉曾祖諱世鐸祖諱源父諱廷楷例授登仕佐郎僑居揚州後因家道中落遂歸六合而君常館揚州君少聰慧九歲作蠅頭書即工整喜摹印章稍長受業於儀徵方立堂先生之門學遂大進嘉慶丙寅補縣學弟子員肄業梅花書阮鹽政阿厚菴先生山長吳山尊先生亟稱賞之試皆前列嗣丁母憂事庶母如母視從昆弟若親昆弟戚黨貧無依者君皆調恤之中式道光辛巳恩科舉人以登仕君年老不赴禮部試越二年登仕君卒哀毀盡禮服闋後兩遇大挑親朋勸君北上謂即不中式亦可與挑選君却之曰士子讀書以求祿仕者不過博父母歡耳今二親俱逝復何志於此耶卒不赴余嘗謂君有三反君最工制義兼善院體書人咸

謂取青紫如拾芥而君足迹不一踏京華塵此一反也君博覽羣籍於聲音訓詁致力甚深而同儕講藝酬酢紛紜君獨若一無所省識者然此二反也君善談名理偶發一語饒有竹林諸賢風味而東身甚嚴履規蹈矩不似晉人之放蕩此三反也吾友梅君蘊生嘗作五君詠以齒爲序君居其首次薛子韻次余次劉楚楨次王西御其詠君詩云淵衷富圭璧含輝資深美履道衆忘介飲和物莫鄙蘊生固不輕許人者其傾倒若此則君之爲人可知矣君生於乾隆甲辰五月二十五日卒於道光戊申九月二十六日春秋六十有五著有石城遊記子史韻編竹齋印譜鋤月種梅花館賦鈔種梅書屋詩草聽鸚館試體詩及制義若干卷配曹孺人勤儉持家孝慈有則生於乾隆戊申五月初八日卒於道光己酉四月初五日春秋六十有二子廕培縣學生孫其祥女適江寧縣學生汪珏君晚年善病而神氣不衰卒之前二日由揚州尅日遄歸與親友訣別奄忽而卒其卒

之日即登仕君忌日也余與蘊生子韻楚楨西御諸君蹤迹至密獨與君
疎闊或隔歲一見或一歲三四見然相視莫逆亦與諸君等也戊申八月
杪存君館中君言笑欵曲甚至未匝月而聞君訃傷已廕培將以庚戌十
二月初三日葬君及曹孺人於六合縣峨眉山之原先期請銘余誼不獲
辭因次序其生平而系之以銘曰

藏器不用反吾性真恬於勢利迺見斯人緬昔子雲自矜寂寞行不副言
人嘲投閣好古樂道君實過之後有來者請視斯辭

是年仍總纂重修儀徵縣志

是年撰劉迪九先生墓表

表云道光某

念樓集卷八
行狀作元

年月日寶應劉寶楠楚楨以其先人行狀及遺

書來請銘文淇與楚楨游最久不敢以不文辭按狀先生姓劉氏諱履恂
字迪九先世蘇州人明初遷寶應遂著籍曾祖中從康熙戊子科舉人石

埭縣教諭祖家晟附貢生本生祖家昇康熙甲午科副榜貢生以孫台斗
貴贈工部營繕司主事父世詵附貢生世修儒業邑人稱道學家必曰東
門劉氏先生年十八補揚州附學生試高等補廩膳生中式乾隆五十一
年舉人年四十九矣時主試者爲故大學士大興朱文正公故編修大庾
戴公心亨所取多績學士而寶應劉氏有三人先生其一也累赴禮部試
不第大挑二等錄用教諭改國子監典簿旋以疾卒於京師從弟營繕君
以其喪歸先生事親孝謹父早卒母成孀人多疾先生與諸弟更侍不假
婢媪雖褻器必啟視色如常則喜與諸弟友愛治家內外有法度善議論
有幹事才解紛撥煩拯人困急嘗畀族人金使治生卒蕩其貲迫飢寒其
妻復碁之來某曰雖渠必更助我無顏尋病死先生歛葬之族某將遠依
其戚謀于先生時方鬻田償責輒盡持其直以爲贖其行誼類如此幼習
毛詩長乃博覽經史百家之說其說經多以經注經折衷一是其詩溯源

騷選質雅冲和著有秋槎雜記一卷義迹山房詩稿一卷即今所刊刻者也先生凡再娶皆喬氏初娶同縣附貢生其崇女賢明不壽繼娶同縣廩貢生光宗女幼涉書史略通文藝年十九來歸前孺人所生子女皆幼孺人曰欲兒輩學閔子騫我先勿爲閔子騫之母慈愛終其身先生鄉舉後奔走衣食終于旅次孺人仰事成孺人俯育諸孤井臼皆親操之成孺人疾不御藥孺人奉藥跪床下率諸子以次伏地移時乃強御孺人退至私室慟欲絕隨遭成孺人及伯子仲子之喪哭泣無虛日年未五十衰病如老人處娣姒善忍讓憂喜與同授事必力教子束修外不名一錢自立身行已至一話一言朝夕檢誨反覆不倦卒之前月將有事先墓猶力疾治滌濯必敬必潔蓋數十年如一日也先生卒於乾隆六十年四月二十一日年五十有八前孺人卒於乾隆三十九年正月二十一日年三十有四孺人卒於嘉慶十六年閏三月二十九日年五十有五合葬城北二十五

里黃陞溝之原前孺人生奉集廩膳生芝集增廣生女適歲貢生喬德全
孺人生寶樹嘉慶丁卯科舉人五河縣教諭次寶楸次寶楠道光庚子科
進士直隸元氏縣知縣孫八人溧縣學生寔恭綬恭珩恭笏縣學生恭冕
恭絢俱府學生曾孫一長年先生以寶楠官贈文林郎元氏縣知縣兩孺
人均贈七品孺人既次序其狀因表其墓曰昔歐陽文忠公爲唐子方之
父贈公作墓表其言有曰余於此見朝廷所以褒贈臣子之意豈不厚哉
又以見士之爲善者雖湮沒幽鬱其潛德隱行必有時而發而遲速顯晦
在其子孫然則爲人子者其可不自勉哉蓋古之爲子者祿不逮養則無
以及其親今之爲子其有克自樹立者則尙有榮名之寵焉嗚呼文忠之
論可謂善勉人子者矣抑余又有說焉世之褒贈及親者豈少也哉然不
能如子方之直聲亮節則亦無以貽親以令名雖榮名之褒贈曷貴焉楚
楨爲縣令十年所至俱有循聲是真無愧於子方而能以令名貽親者矣

榮名之寵云乎哉因系以銘曰

先生之學博乃益精先生之德晦乃益明惟兩孺人同宗之秀先後來歸
女誠是守厥有賢子競爽迪哲能讀遺書能揚先烈果有令名以慰孝思
伐石表阡我無媿辭

按墓表云楚楨爲縣令十年按劉楚楨先生年譜道光二十年進士授
直隸文安縣知縣明年四月赴任二十六年授元氏縣知縣咸豐紀元
去元氏任故繫之此年

是年校刻寶應朱彬

武曹所著之禮記訓纂

按朱彬之子士達序禮記訓纂云丁未解組歸里卜居邗上始得校字
並囑大甥陳孝廉輅詳校未終而卒復延劉孟瞻明經文淇王寬甫封
翁敬之重加校訂閱二年而畢急付梓人又孫念祖序云泊丁未歸田
後屬儀徵陳孝廉輅劉明經文淇高郵王封翁敬之先後詳斟乃付剞

氏版存邗江寓邸襲奔弗敢忘癸丑春府君還白田未浹旬而郡城有警云云據之先生校刻禮記訓纂始于是年其竣工恐在于咸豐元年再按朱彬字武曹一字郁甫寶應人授國子監學錄銜以子士彥官贈光祿大夫內閣學士兼禮部右侍郎與劉端臨汪容甫王石臞邵二雲相善生於乾隆十八年九月卒於道光十四年正月年八十二著有經傳攷證八卷禮記訓纂四十九卷文集四卷詩集一卷朱氏支譜一卷白田風雅二十四卷邑乘志隅玉山草堂課藝各若干卷又編錄劉端臨遺書

是年寄書楚楨之子恭冕

叔俛

橋川子雍氏所藏手札

手札云俯之世講足下去歲曾覆一緘諒已鑒入比維侍奉曼福著述日增爲頌淇現爲岑氏校刻輿地紀勝及朱武曹先生禮記訓纂均約于春夏間可以竣事終日碌碌未遑自理舊業每念英俊勤于編集深爲健羨

論語疏證尊甫已有長編足下能繼述盛業不使高郵父子專美於前是
所望也劉都轉之子茲民茂才深嗜金石昨持凝禪三級浮圖碑見示紀
年元象亦係東魏時物碑稱居士趙姓係元氏人不知此石在否如在此
乞代拓數張分贈同人沈君常山金石志如有釋文亦希抄示沈君書能
代覓一部更妙近來邑中曾訪得新出土及舊有者若干能見知一一否
揣此奉布即頌侍安不一文淇頓首

按清史列傳

卷六十九

及寶應劉楚楨先生年譜恭冕楚楨次子字叔

俛一字俯之號勉齋附監生光緒五年舉人守家學通經訓初入安徽
學使朱蘭幕爲校李貽德春秋賈服注輯述移補百數十事後主講湖
北經心書院編纂沔陽州志黃州府志黃陽縣志晚年治公羊春秋發
明新周之義闢何劭公之謬說又繼父志成論語正義他著何休論語

注訓述廣經室文鈔等

咸豐元年辛亥 六十三歲

五月十四日孫顯曾誠甫生

按劉容季氏來書云顯曾字誠甫一字橙浦戊子科舉人壬辰科進士

官監察御史生於咸豐元年五月十四日卒於民國十七年三月七日

年七十八

十二月撰戴靜齋先生遺書序且於其著四書典故考辨十二卷群書釋地十卷中各擇數十條編爲兩卷刊行之

序云吾鄉戴靜齋先生著述甚多其尤精者四書典故考辨十二卷羣書

釋地十卷詰嗣宗謝文超子揚文越兩君藏其稿於家未能付梓文淇謹

於二書中各擇數十條編爲兩卷寫成樣本吳陶伯中翰汪醇卿太史暨

及門岑生仲陶捐貲刊刻雖所刻無多而吉光片羽實爲希世之珍俾讀

者先覩爲快倘有好古者將二書全行刊布庶先生之學得以盡顯於世

而兩嗣君謹守遺書惟恐失墜之意亦可稍慰云咸豐元年十二月同邑

後學劉文淇謹識

此序青集未收

季冬伯山代先生撰寶應成蓉鏡所著禹貢班義述序

通集卷二

是年仍總纂重修儀徵縣志

咸豐二年壬子 六十四歲

是年重修儀徵縣志五十卷竣功

咸豐三年癸丑 六十五歲

二月二十日孫淑曾生

按劉容季氏來書云生於咸豐三年二月二十日卒於光緒十七年三

月二十日年三十九適曲阜進士山東即用知縣孔昭燾昭燾隨大府

治河落水死淑曾仰藥以殉奉特旨旌表節烈碑傳集補卷六十有傳

二月二十三日林鳳祥等率衆陷揚州

續纂揚州府志卷二十四

二月先生避難邵伯埭青集卷七漢延熹西嶽華山碑舊拓本跋攜出重修儀徵縣志而佚其一卷重修儀徵縣志張丙炎序

八月王西御絕粒死年六十二續纂揚州府志卷十三

九月羅茗香爲賊所殺年六十五揚城殉難錄卷二

羅茗香名士琳茗香其字

諸可寶所編疇人傳三編卷四以茗香爲號次璆爲字

甘泉人上舍生

循例貢太學考取天文生成豐元年恩詔徵舉孝廉方正以老病辭二

月郡城失陷窮餓自甘不屈於賊屢脅入館堅執不從九月間爲賊所

殺至死罵不絕口年六十五給雲騎尉妻孔氏子亨輔婦金氏孫女二

人並被殺茗香精天文算學著述頗富又編續疇人傳六卷工駢儷文

有觀我生室彙稿疇人傳三編卷四揚城殉難錄卷二等有傳

十二月於邵伯市肆獲漢延熹西嶽華山碑舊拓本青集卷七

是月丁儉卿以團練之役橫被仇誣羈繫揚州七閱月先生朝夕省視劉容

季氏謄錄丁晏撰皇清優貢生候選訓導劉君墓誌銘

按丁儉卿所撰墓誌銘云癸丑冬季余以團練之役橫被仇誣羈繫揚州七閱月君朝夕省視患難之交親逾骨肉自痛衰病餘年鮮民之生不如死之久矣蓋此年先生在邵伯鎮故其朝夕省視當在次年

是年楊季子絕粒卒年五十七

按續纂揚州府志卷十一咸豐三年粵匪陷城絕粒死長子諸生建和孫積厚俱自刎死長媳周氏被殺

包慎伯欲避難卒於途年七十九

按續碑傳集卷七十九書安吳包君謝應芝云癸丑歲以避粵賊之亂

卒於途丁晏所撰頤志齋感舊詩云癸丑季冬年七十九卒於海州然

清史列傳卷七十三云咸豐五年卒年八十一者恐誤包世臣字慎伯

安徽涇縣人世榮之從父兄慎言之族兄嘉慶十三年舉人大挑一等

周遊天下誘掖後進所造就尤衆其在揚州最久工詩文書法私淑亭
林潛心經濟著有安吳四種小倦遊閣詩文集

咸豐四年甲寅 六十六歲

避難在邵伯青集卷二重修玉皇閣記

三月撰漢延熹西嶽華山碑舊拓本跋青集卷七

按跋尾云咸豐歲次癸丑余避難邵伯埭上嘉平十日於市肆偶獲是
冊晨夕展玩遂至忘憂天殆憐余衰老聊以此慰藉於羈秋寂寞之時
耶抑神物有知久晦於故紙堆中欲使余之鑒別以顯著其瓌寶也甲
寅三月亟爲重裝爰跋冊尾

秋伯山代先生撰歲貢生董君家傳通集卷六

是年在邵伯寓玉皇閣撰重修玉皇閣記青集卷二

按重修玉皇閣記云咸豐甲寅文淇寓居閣中管君以此次重修未有

記文屬爲紀其年月

是年亂收復後先生回揚州

按丁儉卿序楚楨詩文集十卷念樓府君行狀引云咸豐癸丑余以團練被議羈繫揚州孟瞻時時省視攜襦被與共居

是年與王句生編揚城殉難錄四卷

按男冊二卷殉難者共一千三百三十一人女冊二卷殉難者共一千一百七十七人通共二千四百四十八人自此年二月至十一月止或被殺或絕粒死或焚死或自刎或自縊或入水死不論老幼不堪卒讀別補遺男三十一人女四十一人皆錄自咸豐三年至八年續纂揚州府志忠義節烈本是書云蓋是書亂收復後歸揚先生與王句生合纂而其補遺則句生獨纂耶

是年題王西御僧保秋橋唱和圖并序青集卷十一

題云道光壬午西御與其弟句生翼鳳及梅蘊生省試後買舟石城橋同賦秋柳詩繪圖紀事咸豐癸丑粵寇陷揚郡西御殉難收復後謝守之購得此圖出以屬題時句生游浙江學幕蘊生物故踰十年矣

卯角論交即識君元龍豪氣迥超羣誰知晚值紅羊劫白髮蕭蕭陷賊軍
絕粒吟成絕命詞誦君遺什淚漣洏劇憐垂死呼號際猶盼官軍奏凱時
風景何殊跡已陳白門楊柳浣緇塵披圖誰不增惆悵却少新亭對泣人
九月二十一日巳時卒年六十六

按先考行略

通集卷六云不意項側生癰膿雖出而體甚虛俄頃之間

氣息漸微倏已棄養此皆不孝侍奉無狀致隕天年嗚呼痛哉先考
於乾隆五十四年十月二十三日申時卒於咸豐四年九月二十一日
巳時享年六十六

遺命不延僧道齋懺禮也

丁晏撰皇清優貢生候選訓導劉君墓誌銘

毓崧撰先考行略

咸豐五年二月九日葬於城西郝家寶塔之原通集卷六先考行略

劉楚楨撰墓表念樓外集卷二丁儉卿撰墓誌銘劉容季氏謄錄

同治四年二月二十六日黃孺人卒年七十三其年五月初三日合祔於

郝家寶塔之原通集卷六先母黃太孺人行略

以孫顯曾貴誥贈奉政大夫覃恩晉贈朝議大夫

附錄

劉國子家傳 江東布衣包世臣撰書

江淮間有篤行君子曰懷瑾劉君者嘉慶甲子余再至揚州識凌曙曉樓以識君及君之子文淇孟瞻曉樓蓋君妻弟也孟瞻時年十二三穎敏誠樸善讀書余尤愛之因數過君家與君習庚午余挈眷來僑汜道光甲午乃移居白門前後三十年中間曉樓不祿孟瞻名日起故余論交於揚州以君喬梓爲最久而善也揚人之稱君也謂君齟齬失怙恃淪落甚年十二始入書塾甫三年則已熟經書解文義窶貧不能卒儒業乃習賈而所業復不足自立君私購醫家書乘夜誦習之晝執賈業無遺誤久之人知君能求治者多應手愈遂改業醫君治病者不論貧富皆輒往富室酬報從其意貧者且贈以藥餌或袖錢資將息其有瘡潰膿血臭穢至家人莫敢近者君見可治狀必親爲洗滌加膏丹以瘳

爲度君醫名既噪洎癯老不改其初君家故有祖遺神香肆各房輪值司肆事
其不值之房值者歲貼白金三十兩值者欺君孤弱遂據如私產起家累萬旁
觀憐君困皆憤勸君持約劑結算當得錢千緡君曰貧富命也爲財利傷同氣
之好吾不忍也後據業者蕩其積君境漸給振助之有宗人恩凡君生平行治
其見稱於鄉里者如是余則謂挾術者多居奇攫利者必乘危君雖不諱自濟
而意則專於濟人市肆中無是人也世儒讀書無關於考試者輒莫省或稍加
披覽又厚自矜異君記問過人雖不事舉子業暇輒溫煇經籍泛覽史冊答問
者無所隱滯而絕不以知能自銜庠序中無是人也古之被褐懷玉者大都任
情絕俗而君和易豈弟無崖岸山林中亦無是人也可是可謂幼壯孝弟耆耄好
禮不從流俗修身以俟死者矣君諱錫瑜號琢齋懷瑾其字也援例入國子監
以道光庚子八月八日卒於家年九十有二曾祖春和始自溧水遷揚州以長
子起寅貴贈明威將軍祖起泰國學生父暉始占籍儀徵與從兄瞳俱爲縣學

生員配江都凌氏前卒子一即孟瞻嘉慶己卯優貢生文學爲江淮甲觀藝林
無異詞而年逾五十閉戶著書無幾微不豫色孫一毓崧道光庚子優貢生其
未成童也文筆已騰蹕凌厲排突前哲而馴謹訥言俱有君之風女一適同邑
庠生陳傳洛孫女一適江都國學生田溥光曾孫一壽曾

清故優貢生候選儒學訓導劉君墓表 劉寶楠撰 念樓外集卷二

君諱文淇字孟瞻先世溧水人高祖諱春和監生始遷揚州以長子起寅官贈明威將軍 營守備曾祖諱起泰監生祖諱暉占籍儀徵補縣學生考諱錫

瑜監生累世載德潛伏弗耀君岐巍耆學長通羣經營謂左傳杜注多襲取漢魏人舊說成左傳舊注疏證八十卷纂輯凡四十年始脫藁謂唐孔氏疏多襲劉光伯述議成左傳舊疏考正六卷 按刻本八卷也又以餘力究心地理事道表微闡

幽孜孜不輟成楚漢諸侯疆域志三卷揚州水道記四卷讀書隨筆二十卷青

溪舊屋文集十卷詩集一卷 按美術叢書收錄先生所著藝蘭記吾郡文學自興化任氏寶應劉

氏高郵王氏李氏江都汪氏焦氏江氏儀徵阮氏並博通經史各成羣書衣被

海內君與母舅凌君曙甘泉羅君士琳薛君傳均繼其後而君之學傳習者尤

衆君早補縣學生嘉慶己卯學使蕭山相國湯公以君優行貢太學待次吏部

君事親純孝父年篤老日告君侍起居朝夕扶掖寒夜與父同被臥不入私室

凡十餘年。凌君極貧。遺孤毓瑞。君收育之。延同里方申爲師。並補諸生。通虞氏易。毓瑞通公羊春秋。皆君教也。寶楠與君同貢太學。就館郡城。與君鄰交最深。知君內行最悉。用揭其學行之大者以表君墓。君子毓松優貢生。傳君學。孫四人。壽曾甫成童。已能讀君書。餘幼同歲生寶應劉寶楠謹表。

皇清優貢生候選訓導劉君墓誌銘

同門生山陽丁晏撰文
儀徵吳熙載書丹

嗚呼揚州純儒劉君之墓既卜垆有日矣其孤毓崧以狀來乞銘按狀君諱文
淇字孟瞻儀徵人高祖春和自溧水遷揚以次子守備起寅貴贈明威將軍曾
祖起泰監生祖礪始隸儀徵籍補諸生父國學君錫瑜以醫名世壽逾九秩君
孝養承志能得歡心幼而穎異稍長即研精古學貫串羣經於毛鄭賈孔之書
及宋元以來通儒解誼博覽冥蒐實事求是尤肆力春秋左氏傳謂杜注襲取
先儒雷同勦說君取賈服古注疏通證明上稽先秦諸子下攷漢唐故書旁及
史傳御覽筆記文集左右采獲擇精語詳成書八十卷又輯左傳舊疏攷正六
卷謂孔冲遠刪定舊疏不出一人之手多襲取劉光伯述議攘爲己文其闡明
經義皆前儒所未及也究心涑水通鑑諷誦略皆上口鉤稽正史地理之沿革
水道之變遷尤所諳悉據史記秦楚之際月表謂項羽曾都江都輯項羽王九
郡考十八王分地考又據吳越春秋水經注等書謂唐宋以前揚州地勢南高

北下且東西兩岸未築堤防與今運河形勢迥殊著揚州水道記四卷學有心
得隨時劄記箸讀書隨筆二十卷古文淵雅淳茂不爲無用之作大抵攷訂經
史及闡幽之文爲多著青溪舊屋文集十卷詩一卷君爲人天性誠樸端重無
戲言從學者多歸然尊爲祭酒而君沖挹自下鄉黨遂遂獎人之長忘人之過
顧勇於爲善遇友朋緩急親故窶貧必竭力營救家屢空不恤也自治甚嚴斷
斷於義利之辨守揚郡者如劉公源灝李公璋煜皆重君之學禮接甚恭君道
義自持非公不至可謂純德君子矣嘉慶丁卯君補附學生甲戌君歲試第一
食米廩學使蕭山湯公嘉君經學舉己卯科優貢生以爲多士矜式應秋闈十
四試不售君之意泊如也讀書下帷老而彌篤晚歲阮文達公延主師席深敬
禮之生於乾隆五十四年十月二十三日卒於咸豐四年九月二十一日壽六
十有六遺命不延僧道齋懺禮也配黃孺人子一毓崧能嗣君學道光庚子優
貢生孫四壽曾貴曾富曾顯曾葬於城西郝家寶塔之原君與余以優行同舉

長余五歲締交三十六年間學切劘久要無間病革前一日語毓崧曰淮南書
信已來逾時余書方至君若前知之者亦見君之卷卷於余也癸丑冬季余以
團練之役橫被仇誣羈繫揚州七閱月君朝夕省視患難之交親逾骨肉自痛
衰病餘年鮮民之生不如死之久矣君迺先我歸宅順受考終既爲健羨益深
畫傷銘曰 澹泊儒門君迺振起風雨如晦雞鳴不已膾石蚩飛民多戕死
全受全歸戢身安止守學彌惇修身以俟我銘幽堂永傳千載禩

清故優貢生劉君墓誌銘

實應劉恭冕撰文
邵陽魏耆書丹

君諱毓崧字伯山又字松崖先世有諱春和者由溧水遷揚遂籍儀徵祖諱錫
瑜國學生精習醫術鄉稱仁善父諱文淇嘉慶己卯科優貢生候選訓導掣經
篤行爲世儒宗君束髮受學不好嬉弄八九歲時閱通鑑習其句讀父執驚畏
目爲奇童自是問學日進名譽大起當世持文衡者咸願得君爲舉首道光庚
子以廩膳生舉優行貢太學最後廣東巡撫湘陰郭君嵩奏君樸學宜充八
旗教習以資講課而湘鄉相國會公尤禮異之自訓導君爲左氏學君繼前業
用力甚深旁通諸經史諸子百家之書凡所寓目略能記誦悉其原委廣座中
聞君談論或私取原書核之皆無有誤精於勘校友人有所述作或刊刻多質
君乃定著有春秋左氏傳大義周易尙書毛詩禮記舊疏考證經傳史乘諸子
通義彭城獻徵錄舊德錄王船山年譜通義堂詩文筆記各若干卷君事父母
終身無一日失歡姊妹皆早寡遺孤嗣亦幼就食君家君承先志無所異視撫

教孤幼俾各成立與朋友交勸善懲過終始不渝爲人謀周慎必期有成臨財無所苟取綜君學行質之古人宜無愧已生於嘉慶戊寅二月二十三日卒於同治丁卯八月初九日得年五十歲配汪孺人同邑縣學生諱穀之女有婦德母教爲三黨所知其卒也君爲之誌繼配黃孺人子四壽會同治甲子科副榜貢生貴會富會並縣學生顯會咸世君學女二長適縣學生汪兆會次未字均汪孺人出壽會等將以是年十月二十四日卜葬君於郡城西郊郝家寶塔之原與汪孺人合葬而屬恭冕爲埋幽之文恭冕與君世交垂四十年生平所敬事如君者曾不數人而君今遽歿悲夫乃重爲之銘 其詞曰世稱君爲經師兮抑其行爲無悖也天遽奪此賢達兮世孰爲予誨也顧詒謀之無愆兮大業終其不廢也予冀言以傳信兮非於君有私愛也願長貞茲佳宅兮幸樵采之無逮也

清故副榜貢生候選知縣劉君墓志銘

江甯汪士鐸撰文
秀水高行篤書丹並篆蓋

國家以文德化成海內百年來尤重經術江淮閒推儀徵劉氏自孟瞻先生以經學純德師表儒術余同年伯山繼之其良子恭甫又繼之三世通經精博學者企若吳門惠氏光緒八年孟秋恭甫弟良甫來視余泫然垂涕告恭甫七月十六日以疾卒於家哀動左右余不禁錯愕失聲蓋余從君三世游不幸如昌黎之於馬北平也良甫以君狀來乞銘義不忍以衰朽辭且哀良甫昆季友于之戚而自歎蒲聊不凋芝蘭早賈焉按狀君諱壽曾恭甫其字也又字芝雲同治三年刻榜貢生光緒二年又中副榜第一以籌餉勞得知縣晉同知銜年四十五配李宜人江都方聞士賓嶠女少君三歲子師蒼方九齡女一亦幼明年月良甫等葬君於郡城西郝家寶塔之原狀言國學生諱錫瑜者君曾祖孟瞻先生諱文淇伯山同年諱毓崧皆優行貢生當世幼崽所習聞君之祖若考也嗟乎有生之理必天竺之人養之既資粹抱懿已或不免獲於內外免焉而

穫落無所遇至有所遇遂衍衍醉飽汗漫弗省錄此則宜有人責矣君乃魚濡
獸趨期副知我其神旣敝敝則疾去之勢也念君自同治初旅金陵書局其府
主則洪琴西都轉也其賞拔則曾文正以來六七公也此皆一代名卿大夫甲
推乙掖躋君於雅材之右豈詘於人不知邪食人食者事人事卒以積瘁至不
逮中壽莊生所謂以有涯隨無涯日遠於冥極竭於報稱而忘其原不給也君
孝友謙謹孚於人治經該博摛詞古雅大師碩彥禮先縞帶嘗修江都縣志又
偕余纂江甯府縣志份份冠吾曹所校刊者多官書所自著有傳雅堂詩文集
及札記若干卷昏禮重別論對駁義南史校義集平文譜類釋臨川答問若干
卷良甫等哀之臧於家昔余嘗謂倫理者所以養人性情者也出即勗於所執
入而有孔懷之歡室家之好不猶足宣暢人之志意乎孟瞻先生里居教授伯
山辟寇盡室與偕惟君旅寓吾郡十餘年所居飛霞閣踞冶城山顛下行百數
十級抵山麓始睹人獸迹終歲樵汲寄一屨僮每至窮秋繁霜坐臥一斗室

意勸出步寒烟無極北望廣陵雁行負阻斜暉西沒孤鐙青熒百蟲迸絕雖無
悲笳牧馬之烏烏而我影偶我畧聞遠柝啟牖四顧闐寂塞外度君情猶人耳
安能當此而不慳然動心哉嗚乎此亦足以傷君之一也因爲之銘曰

羞之飽之祖所遺茹也播之穫之考所遺睢也啐之馱之舊德之醜也翼之終
之羣季合耒也孚家孚邦蜚令譽也斧如屋如非山鬼所譴迺神質不節微眚
遂莫之衙也

清故副榜貢生候選直隸州州判劉君墓志銘

邵陽魏鏞撰文
江都吉亮工書丹並篆蓋

君諱貴曾字良甫一字少厓先世有諱春和者由溧水遷居于揚世爲儀徵人曾祖錫瑜太學生祖文淇優貢生候選訓導以經明行修聲于時淮海號爲大師父毓崧優貢生薦舉八旗官學教習閉戶講習高蹈弗仕母汪太恭人生子四壽曾富曾顯曾及君壽曾才而早逝兩中副貢生候選知縣君其仲也自君以上三世攻經學重名誼學行具載國史儒林傳君生而開敏竺行年十二遭寇亂爲賊所掠使之牧馬斯薪數月卒以計挾一兒跳免君自傷屯邗渚厲奮發益劬于學教習故博通四方求請編纂辭文之役無虛日君晝勤糞掃夕讀書訓諸弟佐父兄爲文事故君雖年稚已博涉通經誼大理寺卿臨川李公聯琇峻望少許可唯與君昆季日久無間言君事繼母黃太恭人孝教習捐館金陵食指日鱗處益困伯兄善著書君謝家事而自奉母攜弟妹返揚州米鹽筐篋凌雜之事力任其勞賓祭慶弔必躬必親暇則結社會文四方賓客過揚者

或就君談藝莫不滿其望以去君伯兄嘗語人曰吾之有仲猶吾之有二身也伯兄歿遺二女一子名師蒼方九齡君自督課衣食寒燠一身司之迨長各爲嫁輒師蒼故穎異年十六已能經解詞賦受知於學使丁酉更用選拔中秋賦君大喜曰今可以慰吾兄矣君明恕廉絜纖芥弗苟交游責諾久要不忘故工經藝門下執經請業者或策名委籍以去君凡一再中丙子己丑省試副貢生慨然曰吾十上有司而止此命也候選直隸州州判奔不就君子學多通先是訓導治左氏賈服鄭三君之學糾駁杜氏經營四十年長編甫具寫定者僅一卷君欲助伯兄賡成之而未逮迺從寶應成先生孺受三統曆法推衍春秋朔閏以正杜氏長曆之失爲春秋曆譜它文詞皆有法度而出之必當嗚乎博學而恥于爲名介節而不違俗深藏若虛明穎特達可謂君子儒哉君夙更憂患中歲以後痰濕競作光緒二十四年三月丙戌寅時竟卒於揚城里第年五十有四而富曾先率師蒼應禮部試君屬續神明湛然唯以未能侍養弟姪宦游

爲念延領北矚聲情惻愴哀運旁人嗚乎此可以觀君已配李孺人子師培女
適江都庠生梅兆禱君赴至金陵繇爲位哭寢門外而富曾顯曾具狀來請曰
今將以是年 月 日葬君于城西郝家寶塔之原以祔我先人子其爲銘昔
蔡中郎爲郭有道碑謂無慙色君盛德在躬不期聞達媿負鶩質敢謝不文謹
箸同辭用彰懿美其詞曰於穆劉君溫恭朝夕孝于惟孝作世典則沈摯其性
雪白之仁負寄汎愛永言終身儒門孔修通德大雅玉佩瓊瑤人疇知者仰瞻
棖桷俯察機筵我將我範明粢豆籩庭闈安愉友于竺祐媿彼匪忱睥睨行路
劉殷七業韋賢一經家風用侏永尉先型臥名囂囂撫孤猶子彼問業者亦儒
亦史綜君百行天寔難知我銘牛脊唯無愧辭

清故舉人揀選知縣儀徵劉先生墓志銘

南陵徐乃昌撰文
同邑張允蘇篆蓋下絳昌書丹

江淮間有君子儒焉其菑畚經訓累葉清芬則惠氏紅豆續也其湛深經術兼習洞淵則焦氏里堂亞也其校讎經籍思誤是適則顧氏澗蒼流也其修明經行渠動規言則朱氏柏廬選也幼而孝弟老而好學郭有道所謂人師韓昌黎所謂祭社者繫先生庶幾近之按狀先生姓劉諱富曾字謙甫揚州儀徵縣人曾祖錫瑜國學生祖文淇優貢生候選訓導考毓崧優貢生保薦八旗官學教習被徵未赴徵君四男長壽曾次貴曾皆副貢生季顯曾進士官御史先生其叔子也儀徵劉氏自訓導公治左氏春秋而徵君及先生伯兄更續纂業遞禪三世並入國史儒林傳海內宗仰論者咸以爲難能先生賊質誠樸逮事重親夙秉義方飫聞庭誥少長勝衣就傅率從揚州老宿游故於經史文藝蚤具根柢同治乙丑徵君佐曾文正公墓餽宅金陵先生昆弟悉隨侍誦讀年二十應學院試與仲兄同入邑庠旋肄業鍾山惜陰兩書院主講李大理聯琇薛觀察

時雨孫學士瑋鳴深加器賞當是時內有賢父兄之督責外有良師友之觀摩而先生之學乃大盛丁卯遭外艱先生返里訓迪生徒課餘清暇旁習算法嘉道中甘泉羅氏士琳精疇人術咸同而降繼起者希獨徐氏鳳誥私淑頗殷先生道幸不孤引爲密契切磋砥厲克底于成光緒戊子與季弟同舉於鄉屢試禮部弗售遂絕意進取客授四方最後敖遊海上爲年家子吳興劉京卿承幹典司校勘歷有年所而其精神專注顧莫如宋會要一書是書湮沒已久大興徐氏松供職京都從永樂大典鈔錄計叢巨帙多冊彙本流傳踐更數主頃由京卿收藏京卿雅重先生迺舁而句其審訂先生昕夕鑽研紬繹條理於卷數增減門目分合事實隸屬字句考正一一整比之鉤稽之釐然秩然殺青可付歲次甲子編排甫畢而先生歸老里門矣先生性孝友悅親養志事繼母黃太淑人尤謹迨歿哀毀柴立孺慕終其身伯兄仲兄暨伯兄子師蒼俱先黃太淑人卒師蒼遺孤葆儒崇儒稗甚飲食教誨胥先生是賴家本清素所耕破硯所

挹廉淙然逢械儼困乏不恤典屨衣物急濟其匱又慮風俗澆薄不厭書示格
言冀化其頑立己立人達己達人雖願閔力絀而白首罔勦苟非學行純樸何
以及此可不謂君子儒歟丙寅先生壽登八十重游泮水今年春邁季弟喪先
生令原抱痛氣體驟衰竟於十月二十六日丑時終于里第春秋八十有二著
有遺橐若干卷尙待撥拾寫定禮堂元配江孺人前卒無出嗣伯兄仲女師韞
爲女季弟仲子師穎爲子茲師穎泣奉狀來以下兆有期將葬先生於郡城西
郊郝家寶塔之原與江孺人合墓並以窆志爲請竊念光緒庚辰乃昌伯父光
祿公都轉兩淮揚州故有梅華書院使者例值文課先生輒擢高等用此受知
爲伯父門下生繼又授從弟乃斌經乃昌因識先生函丈周旋談藝無虛日乙
未乃昌服官江甯蹤跡始隔而光風霽月恒縣心目益想見教思之无窮辛亥
以還先生與乃昌同旅松曲幸得常常聚晤商量舊學髣髴當年會乃昌纂南
陵縣志延先生爲編輯山川人物指畫區分恍若孫洪近接几席嗟乎文章道

義之交淡而彌真久而彌固撫今追昔豈容以存歿間哉紀實靈幽乃昌不敏
誼曷忍辭銘曰

觥觥儒術熾且都春秋家法尋常殊先生世澤久涵儒樸
學篤行古爲徒詎經演算操奇觚羽翼炫灼爭前驅校理秘笈剖鏘銖上攀中
壘共轍塗孝乎惟孝兼友于天爵自尊忠信俱樂善好義仁聞數年耆望碩德
充符辰龍在歲賢人徂老成殞謝餘典模我銘無媿異矯誣刻石元堂永不渝

清故監察御史劉先生墓志銘

并序

江都陳懋森撰文
儀徵陳延韓書丹并篆蓋

先生諱顯曾字誠甫姓劉氏先世由江寧遷揚州居郡城而籍儀徵曾祖錫瑜國學生祖文淇候選訓導考毓崧八旗官學教習兩世俱以優行貢太學以先生貴贈如其官妣氏汪繼妣氏黃封大淑人教習君有子四人並著名行長壽曾候選知縣次貴曾候選直隸州州判皆兩中副榜貢生次富曾舉人揀撰知縣其季則先生當嘉道間訓導君以治春秋左氏學名海內教習君暨先生伯兄纘承其業同治初湘鄉曾文正公總督兩江延教習君入幕府先生隨父兄讀書金陵弱冠補諸生時伯兄知縣君主金陵官書局先生則肄業惜陰書院院長薛觀察時兩名宿也器先生多所獎藉知縣君捐館舍先生代主官書局事光緒戊子舉於鄉壬辰成進士以主事籤分吏部補考功司主事洊升員外郎郎中加四品銜轉甘肅道監察御史協理遼瀋道俸滿截取以知府用先生通籍後居京師垂二十年庚子聯軍之役兩宮西狩大臣以下相率奔竄自臺

省迄部寺幾於一空先生時官吏部兼總理各國事務衙門章京或勸其暫避先生以食祿忠事持不可未幾京師陷仍日趨直如故時各國駐軍張甚遇我國官員輒呵問故加凌侮先生以理折之不爲屈光宣之際朝局日非先生居臺諫前後七上封事皆關天下大計方貴倖用事於言官所陳多遏抑唯最後論賦稅徵解銀兩不便一疏奉旨交度支部議奏餘皆留中是以先生所言雖切外莫能知也庚戌丁黃太淑人憂歸翌年國變自此遯跡泰州以王伯厚元遺山自矢遂不復出先生十歲喪母事後母以孝聞伯兄蚤逝仲兄亦前卒禮敬寡嫂撫遺孤有恩叔兄孝廉君無子以己子爲之後歲乙丑先生復由泰返揚時孝廉君猶健在兩老人偶作近游柴杖偕出僂僂道中衣冠古樸貌恭而色溫君子之儒可望而知也先生祖考暨伯兄俱列傳國史儒林人比之東吳惠氏所居青溪舊屋有老柏高外墻外若車蓋屋甚庳陋而三世傳經其中滄桑而後百年詩禮之門殆不多覩先生沒孝廉君旋亦長逝世變方殷未知所

底而吾鄉所稱老成人者數年之間相繼殂謝曾不少留一二以待天下之清
吁可慨也先生以戊辰三月初七日卒春秋七十有八葬於西郊開家坂先塋
之次平生所爲詩文多散佚尙待搜輯付梓書法北朝如金石文字所藏甚富
元配江氏繼娶吳氏君男二人長師慎民政部七品警官蚤卒無子以從兄師
蒼次子崇儒爲嗣次師穎後孝廉君先命生也女四人長字泰州錢慰貞在室
卒次適商水李國璜次適同縣方觀洛次適夏縣賈延禔曾孫二人模楷銘曰
劉氏之先潛德弗曜歸然儒門昉自訓導服賈舊說蔽於當陽訓導闡之左氏
乃昌黃金遺子不如一經爰及諸孫咸有令名諸孫繩繩先生居季郎中御史
官不滿位憂歸明季九鼎遂移鮮民遺民一身兼之晞髮朝陽種桑海濱誓不
復出辱我先人晚計艱難復還故里有兄八十白髮垂耳衰老相視情親意悲
携手道山後先同歸廉頑敦薄誰爲師表天胡不弔不遺一老高墳峨峨樹以
松楸有古君子首正此邱

亡姪丁酉科舉人師蒼墓志銘

旌德朱德澍書丹並篆蓋
叔父儀徵劉富曾撰文

曾祖文淇 嘉慶己卯科優貢生 誥贈奉政大夫 覃恩晉贈朝議大夫

祖毓崧 道光庚子科優貢生薦舉八旗官學教習 誥贈奉政大夫 覃

恩晉贈朝議大夫

父壽曾 同治甲子科 光緒丙子科副榜貢生同知銜候選知縣 誥授

奉政大夫

於虜吾忍銘吾亡姪哉亡姪名師蒼字張侯伯兄恭甫子也幼負異秉讀書過目不忘篤內行無子弟過由廩膳生拔光緒丁酉萃科中式舉人竟以壬寅仲秋送其弟師慎師培應鄉試涉江水阨死年僅二十有九吾忍銘吾姪哉姪生九歲而孤仲兄良甫撫同己子以養以教至於成人戊戌歲仲兄卒今茲亡姪蓋去伯兄之歿歲星未再周去仲兄歿四載猶未安厝也於虜哀哉吾家世治經先祖爲左氏正義長編已就先兄繼之僅及其半姪幼學嗜古有著述才當

家庭暇豫姪每侍側輒以析疑問難爲樂每發一義出人意表纂言提要不讓
儒宿方將與之陳書發篋掇拾叢殘共編定先世遺文焉今已矣姪之著錄遺
墨尙待爲之裒輯整比已悲夫姪生同治十三年八月初三日歿光緒二十八
年八月初四日室胡氏甘泉進士文淵女生子葆儒有遺腹姪已七月重慈衰
邁孳孤悲哀斯亦人生之極艱矣今將於

年

月

日 窆於揚州

西郊郝家寶塔之原爰揭而書諸石銘曰

是爲吾猶子之崇封兮前後岡

道而左右林泉姪生而資性超越兮信孝友之天全威儀瑰璋現天男相兮詎
優曇易萎夫華嚴謂文章之憎命兮何早攀桂闕之聯翩謂生材必有用兮乃
短折首六極凶占遺孤相其歧嶷兮庶詩書之澤孔延賦巫陽而下招兮恨精
衛之難填於虜江流幾時竭兮哀此恨永永安有窮焉我銘汝汝有知否耶寫
淚墨而洳漣千秋萬歲後請視此阡 姪亡之年十一月二十三日遺腹生男

命名崇儒特書碣尾以慰窮泉

富曾手記

亡姪師培墓志銘

至郡城西鄉開家坂叔父揚子劉富曾撰文妻兄揚子何家輅書丹並篆蓋

曾祖文洪 嘉慶己卯科優貢生 誥贈奉政大夫 覃恩晉贈朝議大夫

祖毓崧 道光庚子科優貢生薦舉八旗官學教習 誥贈奉政大夫 覃

恩晉贈朝議大夫

父貴曾 光緒丙子科己丑恩科副榜舉人 敕授文林郎 誥贈奉政大

夫

歲在己未九月二十八日三姪師培病歿京師年甫三十有六也時任大學講

席大學校長蔡子民先生經紀其喪翌年二月命門人劉君叔雅爲之歸榇揚

州旅櫬蕭寺待寒冬窆祖塋焉蓋距宣統辛亥予在武昌一見吾姪後倏已八

年矣迴溯其先一見於蕪湖再見於金陵至武昌則一別永訣終古無再見期

烏乎傷哉予同胞兄弟四人姪爲良甫二兄貴曾子兄得子遲年三十九始生

姪時爲光緒甲申年閏五月初二日猶憶姪甫生兄爨香神前忽潛然下泣予

在旁言曰生兒如願極喜慶事何反感傷爲嗚乎孰知其爲歿折不永微機先動耶姪生而岐嶷髫髻授讀過目成誦習爲詩文有如宿構亡友朱君鳳儀目爲奇童迨兄歿姪入泮後即膺鄉薦是爲光緒壬寅補行庚子辛丑恩正併科時姪年僅十有九也英妙雋聲鵠起會試一不得當游學四方姪材蘊瑰奇少年氣盛思欲有以自見然名之所在謗亦隨之故泛東瀛避難入西蜀又遇險其間坎窞洊經跬步荆棘瀕於輓輓者屢矣茲者班超生入玉門畢萬死于牖下又蒙蔡劉兩君紀理歸喪千里會壘雲天高誼方之古人蔑以加焉學堂門人心喪抱痛更欲爲其師刊遺著傳世何其厚也姪雖死不死矣又況二十餘年游學以來當代名公巨卿耆儒碩學行輩較長多姪所當師事之人而諸老先生咸愛其才願爲忘年交而姪益恂恂抑然持下故人尤樂觀之恩義綢繆相依患難驩其愉樂恤其陵夷拯患分災扶危拯困所謂生死肉骨其大有庇於姪者非惟知己抑且感恩焉矣年來講學京師仍理經生素業予老矣

方期倦游歸來與之同訂先世左疏藁本蓋曾戢理先祖左氏長編并衍習三統天算欲接續大兄二兄所編之業爲之也今無望已姪長身玉立癯瘠秀削如不勝衣而辯口懸河滔滔不窮一名一物精詳考覈旁徵博通均能言其所以然故講席疊主羣弟子奉手受教尊仰斗山無不推崇申叔先生者殆其教澤及人有不能忘者歟夫物忌過盛姪得名太早厥性無恒好異矜奇帽急近利且書法枯槁無潤氣均非壽徵嫂氏李今歲七十有八衰齡值此痛切櫻心倚閭已無望王孫之歸立槁乃轉哭臯魚之死斃斃母子慟見黃泉亦竟於今歲十月十二日相繼下世蓋去姪歿僅朞月十四日也傷已姪生子不育嫂氏歿後予季顯曾以孫葆楹爲嫂氏承重孫死者有知亦應少慰也已配何氏爲余女夫揚子增生何家輅胞妹艱難中間關相從武昌戎馬保全先著稿本蠶叢崎嶇尋夫蜀道今者嫠室哀吟苦空徹悟爰訪名山將爲比邱尼終焉悲夫悲夫銘曰 其生也天旣畀以殊姿然亦第一第之榮而憂患屢經仍爲命

齋而才豐也其歿也天復隄以塞運然名山大業傳之其人後學庶得所會通也
也鑿舍橫經待問撞鐘諸生濟濟披拂春風其在周易曰澤上有地臨君子以
教思無窮

儀徵劉孟瞻先生年譜自跋

稿既成有客詰余曰國人編先賢年譜者頗衆矣咸摘記詩文梗概約舉其言行有功于學甚鉅也今子編孟瞻先生年譜全引詩文繁煩冗漫抑何陋哉余曰子言洵然但余以爲編年譜之事須實事求是不可廁私意且古人云文者人也編者摘記梗概即是編者文未必是先賢文或雖可以知先賢學行而欲渾然體會其爲人與爲學則未矣余所以全引詩文而不敢輕輕廁私意者蓋欲體會先生爲人以自資耳近年斯學滋精審然竊謂學術殊途吾道本尊德性與道問學闕其一不可也從事斯文者不可不維持紀綱致學術同軌又余不孝相繼失怙恃自僑居幽燕未歷半載師之歸道山者已六人而余子亦殤矣海山千里無由奔歸嗚乎余碌碌無成值愧死矣因聊欲以此書告于幽壤余不自揣而試爲者此區區微心耳客握余手曰子之志也壯子之意也善因余退記與客問答語爲跋

劉孟瞻先生年譜校勘記

卷上

一頁二十四行

處士之下脫士字

三頁十行

貧誤貪

四頁四行

困誤因

十八行

年誤十

五頁二十二行

卷六通集四字互倒

八頁二十四行

貧誤貪

十頁十一行

黜誤點

十二頁三行

定在之下誤衍十字

十四頁二十二行

汝士之下誤衍字字

仲博二字當爲注

十九頁十九行

春誤家

二十八頁二十四行

君誤居

三十頁九行

迴誤迴

八頁二十二行

謀誤欲

三十二頁四行

丈布之下誤衍則字

十三行

瞻誤瞻

三十三頁十九行

左釋二字互倒

三十六頁四行

慕君二字互倒

十六行

洪洞之下脫生字

二十三行

哉誤也

三十七頁二行

善誤喜 問疏之下誤衍說字 晚誤既

三十八頁十九行

位誤伍

三十九頁三行

未誤夫

八行

楚楨之下脫嘗字

四十頁八行

坪誤有

四十二頁二十一行

所有二字互倒

四十四頁二十二行

際誤隆 藥定之下脫吟字

四十八頁六行

人之之下衍長字

四十九頁六行

入不互倒

十七行

見於之下脫是字

二十行

許誤詳

五十頁四行

繭逮互倒

五行

夫孔之下脫多字

五十七頁五行

祐誤佑

卷下

一頁十二行

月朔之下脫撰字

二十二行

裨誤稗

四頁五行

材誤杙

二十一行

輿誤與

五頁十四行

己誤巳

四十九行

嶮誤璞

七頁十五行

卿誤鄉

二十頁五行

亦誤示

二十四頁十三行

襄誤裏

二十六頁十八行

固誤周

二十九頁三行

讀者下脫先字

十八行 等誤稱

三十四頁六行 士誤士

十一行 枚誤校

三十五頁二行 退誤進

三十七頁二行 供誤宮

四十二頁十行 與誤無

四十五頁十五行 駢體文二卷誤駢體文十卷

四十七頁十三行 經寫定誤經甫定

五十二頁五行 稟誤彙

五十三頁十四行 浮君下誤衍請字

十八行 慶誤廢

二十三行 問誤間

五十四頁十五行

丹誤舟

五十五頁八行

稟誤彙

十八行

銘曰下誤衍漕字

五十七頁八行

類此者甚多此外誤類此外甚多此者

五十九頁十四行

君誤名

十九行

院誤阮